

人物(乡宦)

經遠通志稿卷八十七上 第一百冊

綏遠通志稿卷八十七上

人物(鄉宦)

綏遠疆宇宏開。橫跨秦漢北方數郡。顧傑士偉人之生乎其間者。攷諸史冊。寥寥無幾焉。殆因邊地興墜屯軍是務。文化尚未大啟耶。魏晉以還。邊郡荒廢。更無論矣。及拓跋力微奮起朔漠。奠都盛樂。子孫繼世。建立後魏。佐命元勳。大多鮮卑之子弟。北族之故舊也。繼是而齊祖高歡。周祖宇文泰。隋祖楊堅。三雄接武。皆為其發祥奮跡之地。帝王崛起。攀附孔多。塞北人材。於斯為盛。唐之遠祖李熙。雖以鎮將家。武川而數傳。至淵久守太原。故北方從龍之士。蓋寡。宋承五代之亂。混一土宇。綏地雖未隸入版圖。然自遼金訖元。經制相承。以文事武功著稱者。代不乏人。而完顏氏得士尤多有明棄地。視為邊外。人文衰歇者。二百

數十年清帝入關。西蒙臣服最早。各旗將帥之選。應運而生。從
平邊亂。裂土封藩。可謂盛矣。雍正之初。始置廳治。惟以地重農。
商文治。未甚措意。光緒中年。始行設學。故有清一代。旗蒙人士。
間以武功自見。逮至季年。漢籍乃有名登仕版者焉。道志謂歸
綏人物。強半邊材。戎帥特立將才一門。以示創例。間亦略述文
儒。是蓋青山黑水靈秀所鍾。人秉堅強剛勁之氣。爰生雄武勇
略之材。風土所關。非偶然也。茲篇不復區分文武。只以土生者
入鄉宦。外來者列仕蹟。而以文藝忠烈義行孝友列女。方技武
術。僑寓繼之。最後綴以帝后義在表章。前脩矜式。後人凡有一
行可取。一藝足錄。但為采訪所及。悉從舊例。著錄於篇云。

鄉宦

↑前漢

李沮。雲中人。事景帝。武帝立十七歲。以左內史為彊弩將軍。後一歲復為彊弩將軍。

郭昌。雲中人。以校尉從大將軍。元封四年。以太中大夫為拔胡將軍。屯朔方。

路博德。西河平州人。以右北平太守從票騎將軍。封邳離侯。票騎死後。博德以衛尉為伏波將軍。伐破南越。益封。其後坐法失侯。為彊弩都尉。屯居延。卒。

趙破奴。故九原人。嘗亡入匈奴。已而歸漢。為票騎將軍司馬。出北地時有功。封從驃侯。坐酎金失侯。後二歲擊虜樓蘭王。復封為浞野侯。後六歲為浚稽將軍。將二萬騎擊匈奴。左賢王為虜所得。居匈奴中。十歲復與其太子安國亡入漢。後坐巫蠱族。

案上述諸人史記前漢書均有傳而於職名籍貫之用字則史記與漢書往往有出入如史記之驃騎漢書悉作票騎此蓋遷固二家用字通假之例也又如趙破奴傳史記謂是九原人漢書謂是太原人此一字之差二家必有一誤就下文嘗亡入匈奴一語揆之則地之距匈奴九原近而太原遠破奴之為九原人殆較可信故本條從史記而不從漢書也又如路博德傳史記漢書并言是西河平州人惟考漢書地理志西河郡所領三十六縣有平定平陸平周而無平州可知平州是平周之誤此必後世傳抄妄改之過也此條不改原文特附論證以供讀者參考云

孫會宗西河人有智略為安定太守嘗與華陰楊惲書諫戒之為言大臣廢退當闔門惶懼為可憐之意不當治產業通

賓客有稱譽。憚不能改。後遇禍。會宗以與憚厚善。免官。

後漢

李興。五原人。隨昱朔方人。田颯代郡人。當新莽篡漢。與石鮪、閔堪各起兵。自稱將軍。建武四年。單于遣無樓且渠王入五原塞。與李興等和親。告興欲令盧芳還漢地為帝。五年。李興、閔堪引兵至單于庭。迎芳與俱入塞。都九原縣。掠有五原、朔方、雲中、定襄、雁門五郡。并置守令。與胡通兵。侵苦北邊。六年。芳將軍賈覽將胡騎擊殺代郡太守劉興。芳後以事誅其五原太守李興兄弟。而其朔方太守田颯、雲中太守橋扈恐懼。叛芳。舉郡降光武。令領職如故。十二年。芳與十餘騎亡入匈奴。其眾盡歸隨昱。昱乃隨使者程恂詣闕拜昱為五原太守。封鐫胡侯。

裴遵雲中人為燉煌太守光武既得河西四郡召見郡邑吏以遵為賢從徵蜀帝既還命遵率偏師從大司馬吳漢討公孫述定蜀地有功曾孫曄順帝時為遼東將軍遷聞喜裴岑雲中人順帝時燉煌太守時呼衍王屢叛侵害河西四郡永和二年岑將郡兵三千人誅呼衍王等斬馘其部眾克敵全師邊境又安立石紀功而還丘靈舉字季智雲中人與同郡郝禮真並為郭泰所知因之成名

案兩漢遞嬗時期五原朔方有李興隨昱諸人初以討新莽而起兵繼而絕盧芳以歸漢而興兄弟且以遭芳忌而殉身焉雖中經曲折不無通胡擾邊之嫌究可略迹原心為去邪從正者勸歸綏識略曾采入編本志仍之又三國

志呂布五原郡九原人其初雖從王允有討董卓之功然
跡其始末反覆變詐其人其事皆無足取故不入正傳而
附其籍貫於此以資攷見焉

↑北魏

羅結代人先世領部落為魏附臣劉顯之逆結從道武幸賀
蘭部後以功賜爵屈蛇侯太武初累遷侍中外都大官總三
十六曹事年一百七歲精爽不衰太武以其忠慤甚信待之
監典後宮出入臥內因除長秋卿年百一十詔聽歸老賜大
寧東川為私第別業并為築城即號曰羅侯城朝廷每有大
事驛馬詢問焉年一百二十卒贈幽州刺史諡曰貞子斤從
太武以力戰有功賜爵帶方公卒諡曰靜陪葬金陵
賀悅訥從父弟初道武居賀蘭部下人情未甚附惟悅舉部

隨從帝嘉之甚見寵待後平中原以功賜爵鉅鹿侯進爵北
新公卒子泥襲爵後降為肥如侯道武崩京師草草泥出舉
烽於安陽城北賀蘭部人皆往赴之明元即位乃罷詔泥與
元渾等八人拾遺左右與北新侯安同持節行并定二州劾
并州刺史元六頭等皆伏罪州郡肅然從太武征赫連昌以
功進爵為琅邪公軍國大議每參預焉又征蠕蠕為別道將
坐逐賊不進當斬贖為庶人久之拜光祿勳為外都大官復
本爵卒子醜建襲
和跋代人世為魏附臣至跋以才辯知名道武擢為外朝大
人參軍國大謀雅有智算賜爵日南公從平中原以功進尚
書鎮鄴以破慕容德軍改封定陵公與常山王遵討賀蘭部
別帥木易干破之出為平原太守跋好修虛譽道武戒之不

革被刑跋世居材山祠墓具存後太武蒐材山每遣祭之
長孫嵩代人也太祖賜名焉父仁昭成時為南部大人嵩寬
雅有器度年十四代父統軍昭成末年諸部乖亂苻堅使劉
庫仁攝國事嵩與元他等率部眾歸之劉顯之謀難也嵩率
舊人及鄉邑七百餘家叛顯走將至五原時實君之子亦聚
眾自立嵩欲歸之見于烏渥稱逆父之子勸嵩歸太祖嵩未
決烏渥回其牛首嵩僂俛從之見太祖于三漢亭太祖承大
統復以為南部大人累著軍功後從征中山除冀州刺史賜
賜爵鉅鹿公歷侍中司徒相州刺史封南平公所在著稱太
宗即位與山陽侯奚斤北新侯安同白馬侯崔宏等八人坐
止車門右聽理萬幾故世號八公晉將劉裕之伐姚泓太宗
假嵩節督山東諸軍事傳詣平原緣河北岸列軍次於畔城

軍頗失利。詔假裕道。裕於舟中望嵩。麾蓋遺以郵酒。及江南食物。嵩皆送京師。詔嵩厚答之。又勅簡精兵為戰備。若裕西過者。便率精銳南出彭沛。如不時過。但引軍隨之。彼至峭陝。間必與姚泓相持。一死一傷。衆力疲敝。比及秋月。徐乃乘之。裕克長安。嵩乃班師。世祖即位。進爵北平王。司州中正。詔問公卿。赫連蠕蠕征討何先。嵩與平陽王長孫翰司空奚斤等曰。赫連居土。未能為患。蠕蠕世為邊害。宜先討大檀。及則收其畜產。足以富國。不及則校獵陰山。多殺禽獸。皮肉筋角。以充軍實。亦愈於破一小國。太常崔浩曰。大檀遷徙。鳥逝疾追。則不足經久。大衆則不能及之。赫連屈丐。土宇不過千里。其刑政殘虐。人神所棄。宜先討之。帝默然。後聞屈丐死。關中大亂。議欲征之。嵩等固諫。不可。帝大怒。責嵩在官貪污。使武士

頓辱尋遷太尉久之加柱國大將軍自是輿駕征伐嵩以元
老多留鎮京師坐朝堂平斷刑獄薨年八十諡曰宣王
長孫道生嵩從子也忠厚廉謹太祖愛其慎重使掌機密與
賀毗等四人內侍左右出入詔命太宗即位除南統將軍冀
州刺史世祖即位進爵汝陰公遷廷尉卿從征蠕蠕與尉眷
等率衆出白黑兩漠間大捷而還世祖征赫連昌道生與司
徒長孫翰宗正娥清為前驅遂平其國昌弟定走保平涼劉
義隆遣將到彥之王仲德寇河南以救定詔道生與丹陽王
太之屯河上以禦之遂誘義隆將檀道濟邀其前後追至歷
城而還除司空加侍中進封上黨王薨年八十二贈太尉諡
曰靖道生廉約身為三司而衣不華飾食不兼味一熊皮障
泥數十年不易時人比之晏嬰第宅卑陋出鎮後其子弟頗

更修繕起堂廡道生還歎曰昔霍去病以匈奴未滅無用家
為今彊寇尚遊魂漠北吾豈可安坐華美也乃切責子弟令
毀宅其恭慎如此子抗早卒
長孫觀抗子少以壯勇知名後襲祖爵上黨王時異姓諸王
襲爵多降為公帝以其祖道生佐命先朝故特不降以征西
大將軍假司空督河西七鎮諸軍討吐谷渾部帥拾寅遁藏
焚其所居城邑而還高祖初拜殿中尚書侍中吐谷渾又侵
逼復假觀司空討降之後為征南大將軍薨諡曰定葬禮依
其祖靖王故事陪葬雲中金陵
長孫莫歸觀之子六歲襲爵降為公高祖賜名稚字承業聰
明有才藝虚心愛士為前將軍從高祖南討授右將軍世宗
時出為撫軍大將軍都督淮南諸軍事蕭衍將裴邃虞鴻襲

據壽春。稚諸子驍果。遂頗難之。號曰鐵小兒。詔河間王琛。總
衆援之。琛欲決戰。稚以雨久。更須持重。琛弗從。遂戰。為賊所
乘。稚後殿。初稚既總彊兵。久不決戰。議者疑有異圖。朝廷重
遣河間王琛及臨淮王彧。尚書李憲等三都督。外聲助稚。內
實防之。會鮮于修禮反於中山。以稚為大都督。北討。尋遣河
間王琛為大都督。酈道元為行臺。稚遣子子裕奉表稱與琛
同在淮南。俱當國難。琛敗。臣全遂生私隙。且臨機奪帥。非算
所長。書奏不納。琛與稚前到滹沱。稚未欲戰。而琛不從。行達
五鹿。為修禮邀擊。琛不赴之。賊總至。遂大敗。稚與琛竝除名。
尋而正平郡蜀反。復假稚鎮西將軍。討蜀都督頻戰有功。除
平東將軍。復本爵。後除尚書右僕射。未幾。雍州刺史蕭寶夤
據州反。復以稚為行臺。討之。稚時背疽未愈。靈太后勞之。曰。

卿疹源如此。朕欲相停，更無可寄。如何？稚荅曰：死而後已。敢不自力。時子彥亦患脚痺，扶杖入辭。尚書僕射元順、顧相謂曰：吾等備位大臣，各居寵位，危難之日，病者先行，無乃不可乎？莫有對者。時薛鳳賢反於正平，薛修義屯聚河東，分據鹽池、攻圍蒲坂，東西連結，以應寶、彘。稚乃據河東，時有詔廢鹽池稅。稚上表曰：鹽池天資，賄貨密邇，京畿唯須寶而護之，均贍以理。今四境多虞，府藏罄竭，然冀定二州且亡，且亂。常調之絹不復可收，仰惟府庫有出無入，必須經綸出入，相補。略論鹽稅一年之中，準絹而言，猶不應減三十萬匹也。便是移冀定二州置於畿甸，今若廢之事，同再失。臣前仰違嚴旨，不先討闕賊而解河東者，非是閑長安而急蒲坂。蒲坂一陷，沒失鹽池三軍口命，濟贍理絕。天助大魏，茲計不爽。昔高祖昇

平之年無所乏少。猶創置鹽官而加典護。非為物而競利。恐由利而亂俗也。况今王公素餐百官尸祿。租徵六年之粟。調折來歲之資。此皆出入私財。奪人膂力。豈是願言。事不獲已。臣輒符司監將尉。還率所部。依常收稅。更聽後勅。雅克寶貨。將侯終德寶貨出走。雍州平。除雍州刺史。莊帝初封上黨王。尋改馮翊王。後降為郡公。遷司徒公。加侍中兼尚書令。大行臺仍鎮長安。前廢帝立。遷太尉公。錄尚書事。賀拔度拔神武尖山人。父爾頭驍勇絕倫。以良家子鎮武川。因家焉。獻文時以功賜爵龍城縣男。為武川鎮軍主。度拔性果毅。襲父爵。亦為本鎮軍主。正光末。沃野人破六韓拔陵反。懷朔鎮將楊鈞聞度拔名。召補統軍。配以一旅。賊偽署王衛。可瓌徒黨尤盛。攻沒武川。又陷懷朔。度拔與子並為賊所虜。

乃與周德皇帝合謀。率州里豪傑。珍念賢。乙弗庫根。尉遲檀等。招義勇。襲殺可瓌。朝廷嘉之。未及封賞。度拔與鐵勒戰。沒。孝昌中。追贈肆州刺史。賀拔允。字可泥。賀拔度拔長子。便弓馬。有膽略。度拔沒。允兄弟俱奔恒州。刺史廣陽王深。深敗。歸尔朱榮。榮素聞其名。待之甚厚。建義初。封壽陽縣侯。永安中。進爵為公。魏長廣王立。除開府儀同三司。封燕郡王。兼侍中。使蠕蠕還。至晉陽。屬齊神武將出山東。允早自結託神武。以其北土之望。尤親禮之。遂與允出信都中。興初。轉司徒。領尚書令。神武入洛。進爵為王。轉太尉。加侍中。魏孝武既忌神武。以允弟岳據關中。有重兵。深相委託。潛使來往。及岳沒。又委岳兄勝。以心腹之寄。神武重舊。尤全護之。天平元年。因與神武獵。或告允引弓擬神

武乃置於樓上。餓殺之。年四十八。神武親臨哭之。贈太保。賀拔勝字破胡。神武尖山人。度拔次子也。少有志操。善左右馳射。北邊莫不推其膽略。衛可瓌圍懷朔。勝從度拔鎮守。既被圍。經年而外援不至。勝慷慨。白鎮將楊鈞。請告急於大軍。鈞許之。乃募勇敢少年。得十餘騎。夜潰圍出。賊追及之。勝曰。我賀拔破胡也。賊不敢逼。至朔州。見臨淮王彧。詞義懇至。彧許出師。還令報命。乃復攻圍。而入。賊追之。射殺數人。至城下。大呼曰。賀拔破胡與官軍至矣。城中納之。鈞復遣勝出覘。武川武川已陷。勝乃馳還懷朔。亦潰。勝父子遂為賊所虜。尋而襲殺可瓌。衆令勝馳告朔州。未反而度拔已卒。刺史費穆奇勝才略。厚禮留之。委以兵事。時廣陽王深在五原。召為軍主。以功拜統軍。又隸僕射元纂。鎮恒州。時有鮮于河胡擁朔州。

流人南下為寇。恒州城人應之。勝與兄允弟岳相失。勝南投肆州。允岳投尔朱榮。榮引岳攻陷肆州。得勝大悅。曰：吾得卿兄弟。天下不足定。時杜洛周據幽定。葛榮據冀瀛。榮乃表勝鎮井陘。及榮入洛。封易陽縣伯。時杜洛周餘燼韓樓據薊城。復以勝為大都督。鎮中山樓。龍勝威名不敢南寇。元顥入洛。榮徵勝使與尔朱兆自硤石度大破顥軍。遂前驅入洛。進爵真定縣公。及榮死。勒所部還都。莊帝大悅。後從尔朱度律拒齊神武。度律與兆不平。勝與斛斯椿詣兆營和之。反為兆所執。兆數之曰：爾殺可瓌罪一也。天柱薨後不與世隆等俱來。而東征仲遠罪二也。我欲殺爾久矣。勝曰：可瓌作逆。勝父子誅之。其功不小。反以為罪。天柱被戮。以君誅臣。勝寧負王。不負朝廷。今日之事。生死在王。但去賊密邇。內媾嫌隙。自古迄

今。未。有。不。破。亡。者。兆。乃。捨。之。太。昌。初。拜。都。督。荆。州。刺。史。驃。騎。
大。將。軍。開。府。儀。同。三。司。南。道。大。行。臺。梁。武。帝。勅。其。子。雍。州。刺。
史。續。曰。賀。拔。勝。北。間。驍。將。爾。宜。慎。之。勿。與。爭。鋒。續。遂。城。守。不。
敢。出。尋。進。位。尚。書。令。進。爵。琅。邪。郡。公。及。齊。神。武。與。孝。武。帝。有。
隙。詔。勝。引。兵。赴。洛。至。廣。州。猶。豫。未。進。而。帝。已。入。關。勝。還。軍。南。
陽。遣。右。丞。楊。休。之。奉。表。入。關。又。令。府。長。史。元。穎。行。州。事。勝。自。
率。所。部。將。西。赴。關。中。進。至。淝。陽。詔。授。勝。太。保。錄。尚。書。事。聞。齊。
神。武。已。平。潼。關。勝。乃。還。荆。州。州。人。鄧。誕。執。元。穎。引。齊。師。時。齊。
神。武。遣。行。臺。侯。景。大。都。督。高。敖。曹。赴。之。中。流。矢。奔。梁。在。南。三。
年。梁。武。帝。遇。之。甚。厚。勝。乞。師。北。討。齊。神。武。既。不。果。乃。求。還。梁。
武。帝。許。之。親。餞。於。南。苑。勝。自。是。之。後。每。執。弓。矢。見。鳥。獸。南。向。
者。皆。不。射。之。以。申。懷。德。之。意。既。至。長。安。詣。闕。謝。罪。魏。帝。握。勝。

手歔歔久之曰。初平西徙。永嘉南渡。漢晉皆爾。事乃闕天。非公之咎也。乃授太師。從周文帝擒竇泰于小關。攻宏農。下河北。擒郡守孫晏。摧破東魏軍于沙苑。追奔至河上。仍與李弼別攻河東。略定汾絳。河橋之役。勝大破東魏軍。收其降卒而還。及齊神武攻玉璧。勝以前軍大都督從周文。見齊神武旗鼓。識之。乃募敢勇三千人。配勝以犯其軍。勝適與神武遇。連叱而字之曰。賀六渾。賀拔破胡。必殺汝也。時勝持稍追神武數里。刃垂及之。神武汗流氣殆。盡會勝馬為流矢所中。死。比副騎至。神武已逸去。勝歎曰。今日吾不執弓矢。天也是。歲勝諸子在東者。皆為神武所害。勝憤恨。因動氣疾。大統十年薨。周文每云。諸將對敵。神色皆動。唯賀拔公臨陣如平常。真大勇也。自居重任。始愛墳籍。乃招引文儒。討論義理。性又通率。

重義輕財。身死之日。唯有隨身兵仗。及書千卷而已。贈太宰。錄尚書事。謚曰貞獻。明帝二年。配饗文帝廟廷。賀拔岳。字阿斗泥。度拔第三子。少有大志。愛施好士。初為太學生。及長。能左右馳射。驍果絕人。不讀兵書。而暗與之合。與父兄赴援懷朔。賊衛可瓌在城西三百餘步。岳乘城射中瓌臂。賊大駭。為廣陽王深帳內軍主。與兄勝俱鎮恒州。州陷。投介朱榮為都督。計事多與榮合。榮赴洛。配甲卒二千為先驅。至河陰。榮既殺朝士。因欲稱帝。岳從容致諫。榮尋亦自悟。乃尊立孝莊。以定策功。賜爵樊城鄉男。從榮破葛榮。平元顥。累遷左光祿大夫。武衛將軍。時万俟醜奴僭號。榮以介朱天光為使持節。大都督。雍州刺史。岳為左廂大都督。侯莫陳悅為右廂大都督。並副天光以討之。時醜奴自圍岐州。遣其大行

臺尉遲菩薩僕射万俟行醜同向武功南渡渭水攻圍趨柵。天光遣岳率千騎赴援菩薩攻柵已克率步騎二萬至渭北。岳於渭南傍水分精兵數十為一處隨地形勢置之明日將百餘騎隔水與賊相見且並東行岳漸前進先所置騎隨岳而集賊不測其多少行二十許里至水淺可濟處岳便馳馬東出似欲奔遁賊謂岳走乃棄步兵南渡渭水輕騎追岳岳東行十餘里依橫岡設伏兵以待之身先士卒急擊之賊便退走岳號令所部賊下馬者皆不聽殺賊顧見之皆悉投馬。俄虜三千人馬亦無遺遂擒菩薩仍渡渭北降步卒萬餘醜奴尋棄岐州北走安定天光方自雍至與岳合勢輕騎追醜奴及之于平涼之長阮一戰擒之高平城中又執蕭寶夤以歸賊行臺万俟道洛退保牽屯岳攻之道洛敗入隴投略陽。

賊帥王慶雲。岳與天光度隴。至慶雲所居永洛城。賊頻出城拒戰。並就擒。餘悉阮之。三秦河渭瓜涼鄯州。咸來歸款。賊帥夏州人宿勤明達降。復叛。岳又討擒之。天光雖為元帥。而岳功效居多。進封樊城縣伯。尋詔都督涇州刺史。進爵為公。普泰初。除都督岐州刺史。進清水郡公。尋加侍中。給後部鼓吹。進位開府儀同三司。兼尚書左僕射。隴右行臺仍停。高平討平隴中餘賊。二年。加都督雍州刺史。孝武即位。加關中大行臺。永熙二年。孝武密令岳圖齊神武。刺心血。持以寄岳。岳懼。乃自詣北境。安置邊防。率衆趨平涼。西界布營。數十里。齊神武遣左丞翟嵩使至關中。岳及侯莫陳悅三年。悅誘岳入營。害於幕中。朝野莫不痛惜之。諡曰武壯。

雷紹字道宗。武川鎮人。有膂力。善騎射。年十八。給事鎮府。嘗

使洛陽見京都禮儀之美還謂同僚曰徒知邊備尚武以圖
富貴不謂文學身之寶也生世不學其猶穴處何所見焉遂
逃歸辭母求師經年通孝經論語嘗讀書至人行莫大於孝
乃投卷歎曰吾離違侍養非人子之道即還鄉里躬耕奉養
遭母憂哀毀骨立由是知名鎮將召補鎮佐後為賀拔岳長
史岳有大事嘗訪而後行及神武起兵紹乃勸岳迎孝武西
都長安以順討逆後岳欲保關中坐觀成敗紹知計不用請
任邊州遂為京兆太守清平理物甚得人和及岳遭侯莫陳
悅之難紹乃棄郡馳赴岳軍與寇洛等迎周文帝悅平以功
授大都督涼州刺史永熙三年為渭州刺史進爵昌國伯周
文以恩舊接之卒於州紹性好施祿賜皆分贍親故及卒無
以送終還葬長安文帝素服臨吊贈太尉

候深神武尖山人機警有膽略孝明末年六鎮饑亂深隨杜洛周南寇後與妻兄念賢歸尔朱榮為中軍副都督莊帝即位封厭次縣子從榮討葛榮於滏口戰功尤多除燕州刺史時葛榮別帥韓樓郝昌等屯據薊城榮令深討樓配衆甚少或以為言榮曰深臨機設變是其所長若總大衆未必能用止給騎七百深遂廣張軍聲率數百騎深入樓境去薊百餘里遇賊帥陳周馬步萬餘大破之虜其卒五千餘人尋還其馬仗縱令入城左右皆諫深曰我兵少不可力戰事須為計以離隙之深度其已至遂率騎夜進昧旦叩其城門韓樓果疑降卒為內應遂遁走追擒之以功賜爵為侯尋為平州刺史仍鎮范陽及尔朱榮死太守盧文偉誘深出獵閉門拒之深勒兵南向進至中山敗行臺僕射魏蘭根元暉立授深儀

同三司定州刺史左軍大都督漁陽郡公節閔帝立仍加開
府永熙初除齊州刺史孝武入關城人劉桃符等潛引汝陽
王暹入據西城深出奔會承制以深行青州事深襲高陽郡
克之親率輕騎夜趣青州城人執刺史東萊王貴平出降及
封延之為青州刺史深遂奔梁為賣漿者所殺

宿石朔方人赫連屈子弟文陳之曾孫也天興四年文陳父
子歸闕太祖嘉之以宗女妻焉賜奴婢數十口拜為上將軍
祖若豆根太宗時賜姓宿氏襲上將軍父沓干世祖時虎賁
幢將從征平涼有功拜虎威將軍侍御郎賜爵漢安男轉中
散遷給事兼領工曹從駕討和龍以功賜奴婢十七戶真君
四年從駕討蠕蠕戰沒世祖悼惜之詔求沓干子時石年甫
十一引見以幼聽歸年十三襲爵拜宣威將軍興光中遷侍

御史拜中壘將軍進爵蔡陽子改義陽子常從獵高宗親欲射虎石叩馬而諫引高宗至高原上後虎騰躍殺人詔曰石為忠臣整馬切諫免虎之害後有犯罪宥而勿坐賜駿馬一匹尚上谷公主拜駙馬都尉天安初遷散騎常侍吏部尚書進爵太山公為北中道都大將延興元年卒追贈太原王諡曰康

周觀代人也驍勇有膂力每在軍陳必應募先登以功進為將軍長史尋轉軍將擊赫連屈丐有功賜爵安川子遷北鎮軍將世祖即位從討蠕蠕以軍功進為都副將鎮雲中神麇中又討蠕蠕大獲增爵為侯從征平涼進爵金城公遷為都將從破離石胡加散騎常侍轉高平鎮將觀善撫士卒號有威名真君初詔觀統五軍西討禿髮保周於張掖後獲咎黜

為金城侯。改授內都大官。出除平南將軍、秦州刺史。復爵金城公。撫馭失和。民薛永宗聚衆於汾曲以叛。觀討永宗為流矢所中。世祖幸蒲坂。觀聞帝至。驚怖而起。瘡重遂卒。

來大千。代人也。父初真。從太祖避難。叱候山。參創業之功。官至後將軍、武原侯。與在八議。大千驍果善騎射。為騎都尉。永興初。襲爵。遷中散。至於朝賀之日。大千常著御鎧。盤馬殿前。朝臣莫不嗟歎。遷內幢將。典宿衛。禁旅。大千用法嚴明。上下齊肅。嘗從太宗校獵。見虎在高巖上。大千持稍直前刺之。應手而死。太宗嘉其勇壯。又為殿中給事。世祖踐祚。與襄城公盧魯元等七人俱為常侍。持仗侍衛。晝夜不離左右。從討赫連昌。共長孫道生與賊交戰。道生馬倒。為賊所擊。大千馳救。賊衆散走。大千扶道生上馬。遂得免。從討蠕蠕。戰功居多。遷

征北大將軍賜爵盧陵公鎮雲中兼統白道軍事。延和初車駕北伐。大千為前鋒。大破虜軍。世祖以其壯勇。數有戰功。兼悉北境險要。詔大千巡六鎮以防寇虜。經略布置甚得事宜。後吐京胡反。以大千為都將討平之。在吐京卒。喪還停於平城南。世祖詔曰。大千忠勇盡節。功在可嘉。今聽喪入殯城內。贈司空。諡曰莊公。

豆代田。代人。太宗時以善騎射為內細射。從攻虎牢。詔代田登樓射賊。矢不虛發。與奚斤前鋒先入。擒劉義隆將毛德祖。并長史司馬三人。以功遷內三郎。從討赫連昌。乘勝追賊入其宮門。門閉。代田踰宮而出。世祖壯之。拜勇武將軍。後從駕平昌。以戰功賜奴婢十五口。黃金百斤。銀百斤。神麈中。討蠕蠕。賜爵關中侯。從討平涼。擊破赫連定。得奚斤等。世祖以定

妻賜之。詔斤膝行授酒於代田。勅斤曰：「全爾身命者，代田功也。」改爵井陘侯，加散騎常侍、右衛將軍，領內都幢將，從討和龍。戰功居多，遷殿中尚書，賜奴婢六十口。以前後軍功，進爵長廣公。加平東將軍，從駕南討，轉太子太保，出為統萬鎮大將。興安中，卒，贈侍中。安東大將軍長廣王諡曰恭。

于什門，代人也。太宗時為謁者，使喻馮跋。跋止什門，歷二十四年。後馮弘上表稱臣，乃送什門還，拜侍御史。太武下詔褒美比之蘇武。

婁提，代人也。顯祖時為內三郎。顯祖暴崩，提謂人曰：「聖主升遐，安用活為？」遂引佩刀自刺，幾至於死。文明太后詔賜帛二百匹。

朱長生，及于提並代人也。高祖時以長生為員外散騎常侍。

與提俱使高車。高車主阿伏至羅責長生等拜。長生拒之曰。我天子使安肯拜下土諸侯。阿伏至羅乃不以禮待長生。以金銀寶器奉之。至羅既受獻。長生曰。為臣內附。宜盡臣禮。何得口云再拜而實不拜。呼出帳。命眾中拜。阿伏至羅慙其臣下。大怒曰。帳中何不教我拜而辱我於大眾。奪長生等獻物。內之叢石之中。兵脇之曰。汝能為我臣則活。如其不降。殺汝。長生與于提瞋目厲聲責之曰。豈有天子使人拜汝。夷我寧為魏鬼。不為汝臣。至羅彌怒。絕其飲食。從行者三十人皆降。至羅乃給以肉酪。惟長生與提不從。乃各分徙之。積三歲。乃得還。高祖以長生等守節遠同蘇武。甚嘉之。拜長生河內太守。于提隴西太守。並賜爵五等男。從者皆為令長。

賀若敦代人也。父統為東魏潁州長史。大統二年，執刺史田
迅以州降。至長安，魏文帝謂統曰：「卿自潁川從我，何日能忘
即拜右衛將軍，賜爵當亭縣公，尋除雍州刺史。卒。敦少有氣
幹，善騎射。統之謀執迅也，慮事不果，沉吟久之。敦時年十七，
乃進策曰：「大人往事葛榮，已為將帥，後入今朱禮，遇猶重。韓
陵之役，屈節高歡，既非故人，又無功效。今日委任，無異於前
者。正以天下未定，方藉英雄之力。一旦清平，豈有相容之理。
以敦愚計，恐將來有危亡之憂，願思全身遠害，不得有所顧
念也。」統乃從之。時大龜山賊張世顯潛來襲統，敦挺身赴戰，
手斬七八人。賊乃退走。統大悅，謂左右曰：「我少從軍旅，戰陣
非一如此。免年時，膽略者未見其人，非唯成我門戶，亦當為
國名將。明年從獨孤，信於洛陽，被圍敦，彎弓三石，箭不虛發。」

信大奇之。言於周文。引置麾下。授都督。封安陵縣伯。嘗從校獵於甘泉宮。時有一鹿突圍而走。敦躍馬馳之。鹿上東山。敦棄馬步逐。至山半。便掣而下之。周文大悅。累遷大都督。車騎大將軍。散騎常侍。儀同三司。進爵廣鄉縣侯。敦既有武藝。周文恒欲以將帥任之。魏廢帝二年。拜右衛將軍。俄加驃騎大將軍。開府。儀同三司。進爵為公。時岷蜀初開。民情尚梗。巴西人譙淹據南梁州。與梁西江州刺史王開業共為表裏。扇動羣蠻。周文令敦率軍討之。斬淹。盡俘其衆。進爵武都公。武成元年。入為軍司馬。自江陵平後。巴湘之地。並內屬。每遣梁人守之。至是。陳將侯瑱、侯安都等圍逼湘州。逼絕糧。援乃令敦率步騎六千度江。赴救瑱等。以敦孤軍深入。規欲取之。敦每設奇伏。連戰破瑱。乘勝徑進。遂次湘州。因此輕敵。不以為虞。

俄而霖雨不已。秋水汎溢。陳人濟師。江路遂斷。糧援既絕。人懷危懼。敦於是分兵抄掠。以充資費。相持歲餘。瑱等不能制。求借船送敦。度江。敦覘知非詐。徐理舟楫。勒衆而還。在軍病死者十五六。晉公護以敦失地無功。除名為民。保定二年。拜工部中大夫。尋出為金州總管。七州諸軍事。金州刺史。三年。從柱國楊忠。引突厥破齊長城。至并州而還。以敦為殿。五年。除中州刺史。鎮函谷。敦恃功負氣。顧其流輩皆為大將軍。敦獨未得兼。以湘州之役。全軍而反。不蒙旌賞。翻被除名。每懷怨怒。屬有臺使至。乃出怨言。晉公護怒。遂徵敦。還逼令自殺。時年四十九。建德初。追贈大將軍。諡曰烈。

案賀若敦。北史周書皆有傳。今本篇不列之。於北周而列之。於西魏者。以敦父子於大統二年叛東魏。而西來時首。

受知於魏文帝。且敦仕於魏。凡二十二年。而仕於周。則僅十年而已。跡其生平。自以廁諸西魏羣臣之列。為較適。惟北史謂敦為河南洛陽人。周書謂為代人。兩史所述。似有出入。實則北史特就賀若氏入仕中國之後言之。周書則稽其祖貫起源處言之也。况北史亦稱其先居漠北。世為部落大人。則賀若氏之本為代人。已可不言而喻。收入綏志。允符其實。此傳於宇文泰。不稱太祖。而稱周文。從北史也。

宇文蚪字樂仁。代武川人。驍悍有膽略。少從征討。累有戰功。封南安侯。孝武西遷。以獨孤信為行臺。信引蚪為帳內都督。隨信奔梁。大統三年。歸闕。進爵為公。擒竇泰。復宏農。及沙苑。河橋之戰。皆有功。又從信討梁公定。破之。累遷南秦州刺史。

驃騎大將軍開府儀同三司。虯每經行陣，必身先士卒。故上下同心，戰無不尅。後除金州刺史，大將軍卒。

案梁公定周書，獨孤信傳作企定。此從北史。

王德，字天恩，武川人。少善騎射，以孝悌稱。初從尔朱榮討元

顥，賜爵同官縣子。又從賀拔岳討平万俟醜奴，別封深澤縣

男。與寇洛等翊戴周文，除平涼郡守。德雖不知書，至於斷決

處分，良無以過。涇州所部五郡，德常為最。及孝武西遷，進封

下博縣伯。行東雍州事。在州未幾，百姓懷之，賜姓烏丸氏。大

統元年，進爵為公，加車騎大將軍，遷儀同三司。北雍州刺史。

後累有戰功，加開府侍中，進爵河間郡公。拜河州刺史。羣羌

率服。後卒於涇州刺史。諡曰獻德。性厚重廉慎，言行無擇。母

幾年百歲。後德終，子慶嗣，小名公奴。性謹厚，位開府儀同三

司初德喪父貧無以葬賣子公奴并一女以營葬事因遭兵亂不復相知及德在平涼始得之遂名曰慶王勇代武川人本名胡仁少雄健有膽決數從侯莫陳悅賀拔岳征討功居多拜別將周文為丞相封包信縣子從禽竇泰復弘農戰沙苑氣蓋衆軍所當必破周文歎其勇敢賞賜特隆進爵為公邛山之戰率敢死之士三百人並執短兵大呼直進出入衝擊殺傷甚多敵無敢當者時大軍不利唯胡仁及王文達耿令貴三人力戰皆有殊功軍還皆拜上州刺史令探籌取之胡仁遂得雍州賜名勇進侍中驃騎大將軍開府儀同三司恭帝元年從征蠕蠕破之進爵新陽郡公賜姓庫汗氏又別封永固縣伯請迴授兄子興時人義之尋進大將軍卒子昌嗣官至大將軍

王盟字侁。其先樂浪人。祖珍。魏黃門侍郎。贈并州刺史。樂浪公。父罷。伏波將軍。以良家子鎮武川。因家焉。魏正光中。破六韓拔陵攻陷諸鎮。盟亦為其所擁。後流寓中山。復以積射將軍。從蕭寶夤西征。及周文帝平侯莫陳悅。除盟原州刺史。孝武至長安。封魏昌縣公。大統三年。徵拜司空。轉司徒。文帝東征。以留後大都督行雍州事。節度關中諸軍。趙青雀之亂。輔太子出頓渭北。事平。進長樂郡公。賜姓拓跋氏。遷太保。九年。進位太傅。加開府儀同三司。盟姿度宏雅。仁而汎愛。雖居師傅。而謙恭自處。未嘗以勢位驕人。魏文帝甚尊重之。十一年。薨。贈本官。諡曰孝定。

王勸字醜興。盟子。忠果有材幹。年十七。從周文帝入關。及平秦隴。定關中。周文嘗謂曰。為將坐見成敗者上也。披堅執銳。

者次也。勸曰：意欲兼被之。周文大笑，尋拜散騎常侍，賜爵梁甫縣公。大統初，為千牛備身，直長領左右出入卧内，小心謹厚。魏文帝嘗曰：王勸可謂不二心臣也。沙苑之役，勸以都督領禁兵，居左翼，被傷重，卒於行間。周文深悼之，贈使持節、太尉、尚書令、十州諸軍事、雍州刺史，追封咸陽郡公，諡曰忠武。勸弟懋，字小興，盟之西征也。懋幼留山東，永安中始入關，與盟相見，遂從征伐。大統初，賜爵安平縣子。後進爵為公，遷右衛將軍，盟卒，懋上表辭位，乞終喪制。魏文帝不許，累遷開府儀同三司、侍中、左衛將軍。懋溫和敬慎，宿衛十餘年，未嘗有過。廢帝二年，除南岐州刺史，賜爵安寧郡公。後拜小司寇，卒於官。

若干惠，字惠保，代武川人。父樹利，周從魏廣陽王深征葛榮。

戰沒。贈冀州刺史。惠以別將從賀拔岳。以功封北平縣男。及岳為侯莫陳悅所害。惠與寇洛、趙貴等同謀。翊戴周文。仍從平侯莫陳悅。拜直閣將軍。從禽竇泰。復弘農。破沙苑。每先登陷陣。加侍中。開府儀同三司。封長樂郡公。大統四年。從魏文帝東巡洛陽。與齊神武戰於河橋。力戰破之。七年。遷領軍。高仲密來附。周文迎之。軍至洛陽。齊神武屯於邙山。惠為右軍。與中軍大破之。齊兵乃萃左軍。軍將趙貴等戰不利。會日暮。齊神武進兵攻惠。惠擊皆披靡。至夜中。神武騎復來追惠。惠徐下馬。顧命厨人營食。食訖。謂左右曰。長安死。此中死。異乎。乃建旗鳴角。收軍而還。神武追騎憚惠。疑有伏兵。不敢逼。至弘農。見周文。陳賊形勢。恨其垂成之功。虧於一篲。歎不自勝。周文壯之。遷司空。惠性剛直。有勇力。撫御將士。莫不懷恩。

侯景內附。鎮魯陽。薨於軍。加贈秦州刺史。諡曰武烈。
趙善字僧慶。代武川人。趙貴之從祖兄也。少好學。美容儀。沈
毅有遠量。尒朱天光討邢杲。万俟醜奴以為長史。普泰初為
大行臺尚書。封山北縣伯。天光敗死。善請收葬。齊神武義而
許之。賀拔岳總關中。迎善為長史。岳為侯莫陳悅所殺。善乃
翊戴周文帝。魏孝武西遷。改封襄城縣伯。歷位尚書。左右僕
射。進爵為公。善性溫恭。有器局。雖位居端右。而愈自謙退。時
人稱其有公輔量。大統九年。從戰邛山。為敵所獲。卒於東魏。
梁禦字善通。其先安定人。後因官北邊。遂家於武川。改姓紇
豆陵氏。高祖侯力提從魏太武征討。位揚武將軍。定陽侯禦
少好學。進趣詳雅。及長。更好弓馬。尒朱天光西討。引為左右
共平關隴。除益州刺史。第一領人酋長。封白水縣侯。從賀拔

岳鎮長安。及岳被害。翊戴周文帝。周文既平秦隴。欲引兵東下。雍州刺史賈顯持兩端通使於齊神武。周文知其意。以禦為大都督。雍州刺史領前軍先行。說顯出迎周文。禦遂入鎮。大統元年。進爵信都縣公。授尚書右僕射。從周文復弘農。破沙苑。加侍中。開府儀同三司。進爵廣平郡公。出為東雍州刺史。為政舉大綱而已。人庶稱之。薨於州。贈太尉尚書令。雍州刺史諡曰武昭。

寇洛。上谷昌平人。父延壽。魏和平中。以良家子鎮武川。因家焉。洛性明辯。不拘小節。賀拔岳西征。從入關。以功封安鄉縣子。及岳為大行臺。以洛為右都督。侯莫陳悅既害岳。洛素為衆信。乃收集將士。志在復讐。既至原州。衆推洛為盟主。統岳之衆。至平涼。周文^帝至。以洛為右都督。從討侯莫陳悅。平之。拜

涇州刺史。大統初，詔加開府，進爵京兆郡公。四年，鎮東雍州。五年卒於鎮，贈太尉、尚書令，諡曰武。念賢字蓋，盧金城枹罕人。父求就，以大家子戍武川鎮，仍家焉。賢美容質，頗涉經史。兒時在學中讀書，有善相者過，諸生競詣之，賢獨不往，笑謂諸生曰：「男兒死生富貴，皆在天也。何遽相乎？」少遭父憂，居喪有孝稱。後以破衛可瓌功，除別將。又以軍功封屯留縣伯。從尔朱榮入洛，兼尚書右僕射、東道行臺進爵平恩縣公。永熙中，孝武以賢為中軍北向大都督，進爵安定郡公，加侍中，開府儀同三司。大統初，拜太尉，為秦州刺史，加太傅，給後部鼓吹。三年，轉太師、都督河州刺史、大將軍。久之，還朝，兼錄尚書事。時行殿初成，未有題目，帝詔近侍各名之，對者非一，莫允。帝心賢，乃為圓極，帝笑曰：「正與朕意。」

同。即名之。河橋之役。賢不力戰。名頗減。五年。除都督。秦州刺
史。薨於州。諡曰昭定。

耿豪。鉅鹿人。本名令貴。其先家於武川。豪少麤獷。有武藝。好
以氣陵人。賀拔岳西征。引為帳內。岳被害。歸周文。以武勇見
知。豪亦自謂所事得主。從討侯莫陳悅。及迎孝武。錄前後功。
封平原子。沙苑之戰。血染甲裳。盡赤。周文歎曰。令貴武猛。所
向無前。觀其甲裳。足以為驗。不須更論級數也。進爵為公。從
周文戰邛山。豪謂所部曰。大丈夫除賊。須右手拔刀。左手把
稍。直斫。直刺。慎莫畏死。遂大呼。獨入敵。人鋒刃亂下。當時咸
謂豪歿。俄然奮刀而還。戰數合。當豪前者。死傷相繼。又謂左
右曰。吾豈樂殺人。但壯士除賊。不得不爾。周文嘉之。拜北雍
州刺史。賜姓和稽氏。進位侍中。驃騎大將軍。開府儀同三司。

豪性凶悍。言多不遜。周文惜其驍勇，每優容之。豪亦自謂意氣冠羣，終無所屈。及卒，周文痛惜之。

乙佛朗，字通照，其先東部人，世為部落大人。與魏徙代後，因家上樂焉。朗少有俠氣，以善騎射稱。孝莊末，北邊擾亂，避居并肆間。尔朱榮見而重之，以功封蓮勺子隸，賀拔岳為左廂都督，孝武禦齊神武，授朗閣內大都督。及帝西入，詔朗為軍司先驅，靖路至長安，封長安縣公。卒於岐州刺史。臨終，惟云恨不見河洛清平，重反京縣，以此為恨。

案後魏自晉永嘉四年并州刺史劉琨表封拓拔猗盧為代公，後其部族均稱代人，地兼今之大朔、歸綏、內蒙古諸部，亦即山西雁門以北及本省大青山以南各地也。至武川為六鎮之一地，在塞外，今為武川縣境。

上東魏

蔡儁。廣寧石門人。父普。北方擾亂。守五原有功。拜寧朔將軍。卒。贈燕州刺史。儁豪爽。有膽略。齊神武微時。深相親附。神武謀誅杜洛周。儁預其計。事泄。歸尔朱榮。從入洛。及從破葛榮。平元顥。封烏洛縣男。隨神武舉義。及平鄴。破韓陵。並有戰功。進爵為侯。出為齊州刺史。為政嚴暴。然亦明解。吏人畏服之。性好賓客。頗稱施惠。天平中。卒於揚州刺史。贈尚書令。司空公。諡曰威武。

韓賢。字普賢。廣寧石門人。壯健。有武勇。為尔朱度律帳內都督。封汾陽縣伯。後為廣州刺史。及齊神武起義。度律以賢素為神武所知。恐有變。遣使徵之。不願去。乃密遣羣蠻多舉烽火。若有寇至。使者遂為啟。得停賢。仍潛通誠於神武。後拜建

州刺史。天平初為洛州刺史。州人韓木蘭等起兵，賢擊破之。親自案檢收甲仗，有一賊窘迫，藏屍間，見將至，忽起斫賢，斷其脛而卒。贈尚書令、司空、子裔嗣。

任祥字延敬，廣寧少和，厚有器度。初從葛榮，榮敗先降，拜鎮遠將軍、廣寧太守，賜爵西河縣公。隨齊神武起兵，封魏郡公。後兼尚書左僕射，進開府儀同三司。祥位望既重，能以寬和接物，人士稱之。及斛斯椿釁發，祥棄官歸神武。天平初拜侍中，遷徐州刺史。在州大有受納，然為政不殘，不為民所疾苦。

穎川長史賀若徽附西魏，祥戰失利，還與侯景、高昂共攻拔穎川。元象元年卒於鄴，贈太尉公，錄尚書事。

莫多婁貸文，太安狄那人，驍果有膽氣。從神武起兵，破尔朱兆於廣阿，封石城縣子。從破回胡於韓陵，進爵為侯。從平尔

朱兆於赤硤嶺獲兆屍。天平中進爵為公。晉州刺史。元象初。除車騎大將軍。儀同三司。南道大都督。與行臺侯景攻獨孤。信於金墉城。死於周軍。贈尚書左僕射。司徒公。

尉長命。太安狄那人。父顯。魏代郡太守。長命性和厚。有器識。參預齊神武起兵。破尔朱氏於韓陵。拜安南將軍。樊子鵠據兗州反。除東南道大都督。與諸軍討平之。徙幽州刺史。督安平二州。雖多聚斂。然以恩撫民。少得安集。卒。贈司空。諡曰武壯子興。字敬興。便弓馬。有武藝。位冠軍將軍。

竇泰。字世寧。太安捍殊人。本出清河。觀津。曾祖羅。魏統萬鎮將。因居北邊。父樂。魏末破六韓拔陵為亂。與鎮將楊鈞固守。遇害。泰貴。追贈司徒。泰善騎射。有勇略。父兄戰歿於鎮。身負骸骨歸尔朱榮。以從討邢杲功。賜爵廣阿子。神武之為晉州。

請泰為鎮城都督。參謀軍事。累遷侍中。京畿大都督。尋領御
史中尉。泰以勲戚居臺。百僚憚之。天平三年。神武西討。令泰
自潼關入。四年。泰至小關。為周文帝所襲。衆盡沒。泰自殺。贈
大司馬。太尉。錄尚書事。諡武貞。

段榮。字子茂。姑臧武威人。祖信仕沮渠氏。後入魏。以豪族徙
北邊。仍家於五原郡。父連安。北府司馬。榮少好曆術。專意星
象。正光初。謂人曰。吾今觀玄象。察人事。不及十年。當有亂矣。
亂起此地。天下因此橫流。無可避也。未幾。如言。榮遇亂。與鄉
舊携妻子南趣平城。屬杜洛周為亂。榮與齊神武謀誅之事。
不捷。共奔。余朱榮。後神武建義。山東榮贊成大策。神武南討。
鄴。留榮鎮信都。所需軍資。榮轉輸無闕。神武入洛。論功封姑
臧縣侯。轉授瀛州刺史。榮妻武明。皇后姊也。榮恐神武蒙私。

親之議。固推諸將。竟不之州。尋行相州事。後為濟州刺史。天
平三年。神武將圖關右。與榮密謀。榮稱未可。及渭曲失利。神
武曰。不用段榮言。以至於此。四年。除山東大行臺大都督。甚
得物情。元象元年。授儀同三司。二年五月卒。贈太尉尚書左
僕射。諡曰昭景。

万俟普。字普撥。太平人。其先匈奴之別種也。雄果有武力。正
光中。破六韓拔陵構逆。逼授太尉。後歸魏。授後將軍。第二領
人首長。隨孝武入關。拜司空。齊神武平夏州。普乃率其部落
來奔。神武躬自迎接。封河西郡公。位太尉。薨。贈太師。子洛。字
受洛。干豪壯。有武藝。騎射過人。為鄉閭所伏。隨尔朱榮。每有
戰功。累遷汾州刺史。隨孝武入關。除左僕射。天平中。隨父東
歸。封建昌郡公。再遷領軍將軍。河陰之戰。諸軍北渡橋。洛以

一軍不動。謂西人曰：「万俟受洛干在此，能來可來也。」西人畏而去之。神武名其所營地為回洛城。洛慷慨有氣節，勇銳冠時。當世推為名將。興和初卒。

破六韓常字保年，附化人。匈奴單于之裔也。父孔雀領民酋長常，沉敏有膽略，善騎射。累遷平西將軍。齊神武起義，常為附化守。與万俟受洛干東歸。神武嘉之，上為撫軍。與諸將征討，又從神武攻擊諸寇。累遷車騎大將軍，開府，封平陽公。除洛州刺史，秩滿還晉陽。拜太子太保，卒於滄州。刺史庫狄干善，無人。後北遷朔方。干鯁直，少言，有武藝。正光初授將軍，宿衛於內。孝昌元年，奔雲州，為刺史。費穆送於尔朱榮。隨入洛，後從神武起兵，破四胡於韓陵，封廣平縣公。尋進郡公。神武討高仲密，以干為大都督，前驅。干上道，不過家，見俟

景不遑食。景使騎追饋之。時周文自將兵至洛陽。軍容甚盛。諸將未欲南度。干決計濟河。神武大兵繼至。遂大破之。還為定州刺史。清約自居。不為吏人所患。遷太師。天平初。以干元勳佐命。封彰武郡王。轉太宰。干尚神武妹樂陵長公主。以親地見待。常總大衆。威望之重。為諸將所伏。薨。贈假黃鉞。太宰。諡曰景烈。

斛律羌舉太安人。少驍果。從尔朱兆。兆破乃歸。誠神武。以其忠於所事。亦加嗟賞。天平中。除大都督。後從神武戰於沙苑。時議進趣計。羌舉曰。黑獺若欲固守。無糧援可恃。今揣其情。欲一死決。有同獺犬。或能噬人。且渭曲土濘。無所用力。若不與戰。徑趣咸陽。咸陽空虛。可不戰而剋。拔其根本。則黑獺之首。可懸軍門。時諸將議有異同。遂戰於渭曲。大軍敗績。後封。

密縣侯。為東夏州刺史。卒。贈儀同三司。子孝。鄉嗣。
張瓊。字德連。代人也。少壯健。有武略。魏世。自盪寇將軍。為朔
州征虜府外兵參軍。隨葛榮。為亂。榮敗。歸。尔朱榮。以為都督。
討元顥。有功。除汲郡太守。建明初。為東道慰勞大使。封行唐
縣子。轉太尉長史。出為河內太守。除濟州刺史。尔朱兆敗。歸
齊。神武遷汾州刺史。天平中。神武襲克夏州。以為慰勞大使。
仍留鎮之。尋為周文帝所陷。卒。贈使持節。燕。恒。雲。朔。四州諸
軍事。大將軍。司徒公。恒州刺史。有二子。長欣。次遵。業。欣。普。泰
中。為都督。隨尔朱世隆。以功。尚魏平陽公主。除駙馬都尉。大
將軍。開府儀同三司。建州刺史。南鄭縣伯。瓊常語親識曰。凡
人官爵。莫若處中。欣位秩太高。深為憂慮。而欣豪險。放縱。遂
與公主情好不協。尋為武帝所害。時稱瓊之先見。遵。業。討元

顓有功封固安縣開國子。除寧遠將軍雲州大中正。天平中。除清河太守。尋加安西將軍建州刺史。武定中。隨儀同劉豐。討侯景。兵敗被擒。見殺於渦陽。

案神武廣寧太安太平附化諸郡魏地形志並屬朔州。本漢五原郡地。乃正光初改置之懷朔鎮地也。至孝昌中。陷。始寄治并州界山西。舊志並繫之朔州。縣翕非是。光緒朝重修志。乃改繫於烏拉特蒙古部。即今包頭五原固陽三縣境地。始為是正。

北齊

薛孤延。代人也。少驍果。有武功。韓樓之反。延與王懷等密計。討樓。為樓尉帥。乙弗醜所覺。力戰破醜。遂相率歸。行臺劉貴表為都督。加征虜將軍。賜爵永固縣侯。後隸高祖。為都督。仍

從起義破尔朱兆於廣阿。因從平鄴。以功進爵為公。轉大都督。從破四胡於韓陵。加金紫光祿大夫。從追尔朱兆於赤碭嶺。除第一領民酋長。孝靜立。拜顯州刺史。累加車騎將軍。天平四年。從高祖西伐。至蒲津。竇泰於河南失利。高祖班師。延殿後。且戰且行。一日斫折刀十五口。還轉梁州刺史。從征玉璧。又轉恒州刺史。從破周文帝於邛山。進爵為縣公。後兼領軍將軍。出為滄州刺史。別封溫縣男。齊受禪。別賜爵都昌縣公。性好酒。率多昏醉。而以勇決善戰。每大軍征討。常任前鋒。故與彭劉韓潘同列。天保二年。為太子太保。轉太子太傅。八年。除肆州刺史。加開府儀同三司。食洛陽郡幹。尋改食河間郡幹。

張保洛。代人也。家世好客。尚氣俠。頗為北土所知。保洛少率

健善弓馬。魏孝昌中，北鎮擾亂，保洛亦隨衆南下。葛榮僭逆，以保洛為領左右，榮敗，仍為尒朱榮統軍。累遷揚烈將軍。後隸高祖為都督，從討步蕃。及高祖起義，保洛為帳內，從破尒朱兆於廣阿，尋遷右將軍。仍以帳內從高祖圍鄴城，既拔，除平南將軍。從破尒朱兆等於韓陵，因隨高祖入洛，加安東將軍。後高祖啟滅國邑，分授將士，保洛隨例轉昌平縣簿家城鄉男，轉都督。從高祖襲夏州，剋之。万俟受洛干之降也。高祖遣保洛與諸將於路接援。元象初，除西夏州刺史。又以前後功封安武縣伯，轉行蔚州刺史。從高祖攻周文帝於邛山，圍玉璧，攻龍門，還留鎮晉州。世宗即位，以保洛為左廂大都督。王思政援頰川未克，世宗仍令保洛鎮揚志塢，使與揚州為犄角勢。頰川平，尋除梁州刺史。顯祖受禪，仍為刺史。

庫狄威字安盛懷朔人性和柔少有武用初為神武親信都督從征伐累遷幽州刺史封長廣縣公齊受禪改封華陽縣公後拜特進卒贈太尉公

潘樂字相貴廣寧石門人父永有技藝襲爵廣宗男樂寬厚有膽略初歸葛榮榮敗隨朱榮為別將討元顥以功封敷城縣男齊神武出牧晉州引樂為鎮城都將後從破朱兆於廣阿進爵廣宗縣伯累以軍功拜東雍州刺史神武嘗議欲廢州樂以東雍地帶山河境連胡蜀形勝之會不可棄也遂如故後從破周師於河陰改封金門郡公文宣嗣事鎮河陽破西將楊標等時帝以懷州刺史平鑿等所築城深入敵境欲棄之樂以軹關要害必須防固乃更修理增置兵將而還還鎮河陽拜司空齊受禪進封河東郡王遷司徒周文東至

嶠陝遣其行臺侯莫陳崇從齊子嶺趣軹關儀同楊標從鼓
鐘道出建州陷孤公戍詔樂總大衆禦之樂晝夜兼行至長
子崇遂遁又為南道大都督討侯景樂發石鼈南度百餘里
至梁涇州涇州舊在石梁侯景改為淮州樂獲其地仍立涇
州又克安州之地除瀛州刺史仍略淮漢天保六年卒於懸
瓠賜假黃鉞太師大司馬尚書令
皮景和廣寧石門人初以親信事神武除庫直正都督天保
初授通州刺史封永寧縣子從襲庫莫奚度黃龍征契丹定
稽胡討蠕蠕每有戰功累遷殿中尚書侍中景和於武職中
兼掌吏事又性識平均武平中恒令案覆詔獄據理執正由
是過無枉濫後除特進封廣漢郡公遷領軍將軍琅邪王之
殺和士開兵指西闕內外莫知所為景和請後主出千秋門

自號令事平。除尚書左僕射。陳將吳明徹寇淮南。令景和拒之。除領軍大將軍。封文城郡王。又有平陽人鄭子饒。詐依佛道。設齋會。用米麩不多。贍供甚廣。密從地藏。漸出餅飯。愚人以為神力。見信於魏衛之間。將為逆亂。謀泄。乃潛度河。聚衆自號長樂王。已破乘氏縣。景和遣騎擊破之。禽子饒。送鄴烹之。吳明徹圍壽陽。敕景和與賀拔伏恩救之。他將多傾覆。唯景和全軍而還。除尚書令。武平六年卒。贈太尉。錄尚書事。

韓軌字伯年。太安狄那人。少有志操。深沈喜怒。不形於色。神武鎮晉州。引為鎮城都督。及起兵於信都。軌贊成大策。從破

尔朱兆於廣阿。又從破韓陵陣。封平昌縣侯。仍督中軍。從破

尔朱兆於赤碭嶺。再遷秦州刺史。甚得邊和神武。巡秦州。欲

以軌還。仍賜城人戶別絹布兩匹。州人田昭等七千戶皆辭。

不受唯乞留軌。神武嘉歎，乃留焉。頻以軍功進封安德郡公。遷瀛州刺史。在州聚斂，為御史糾劾，削除官爵。未幾復其安。德郡公。歷中書令、司徒。齊受禪，封安德郡王。謙恭自處，不以富貴驕人。後拜大司馬。從文宣征蠕蠕，卒。贈假黃鉞、太宰、太師。諡曰肅武子。晉明嗣。天統中，改封東萊王。有俠氣，留心學問。招飲賓客，一席動費萬錢。朝廷欲處之要地，必以疾辭。告人云：廢人飲美酒，對名勝，安能作刀筆吏。披故紙乎。武平末，除尚書左僕射。百餘日，便謝解官。

綦連猛，字武兒，代人。少有志氣，便習弓馬。永安三年，尔朱榮徵為親信。至洛陽，榮被害，即從尔朱世隆奔出建州。仍从尔朱兆入洛。其年又從兆討紇豆陵步藩，補都督。普泰元年，加征虜將軍。猛父母兄弟皆在山東。尔朱京纏欲投高祖，謂猛

曰王以爾父兄皆在山東。每懷不信。爾若不走。今夜必當殺爾。猛不從。京纏舉稍脅之。猛乃從去。去城五十餘里。即背京。纏復歸。尔朱兆及兆敗。乃歸高祖。高祖問曰。尔朱京纏將爾投我。爾中路背去。何也。猛乃具陳服事之理。不可二心。高祖曰。爾莫懼。服事人法。須如此。遂補都督。步落稽等起逆。在覆釜山。使猛討之。大捷。特被賞賚。元象元年。從高祖與周文帝戰於邛山。二年。除平東將軍。又轉中外府帳內都督。賞邛山之功。封廣興縣開國君。五年。梁使來聘。云有武藝。求訪此人。欲與相角。世宗遣猛就館接之。雙帶兩鞮。左右馳射。兼共試力。挽彊弓。梁人引弓兩張。力皆三石。猛遂併取四張。疊而挽之。過度。梁人嗟服之。其年。除撫軍將軍。別封石城縣開國子。食肆州。平寇縣。幹。天保元年。除都督。秦州刺史。別封雍州京

兆郡覆城縣開國男。從顯祖討契丹，大獲戶口。又隨斛律敦
北征茹茹，敦令猛輕將百騎深入覘候，還至白道與軍相會。
因此追躡，遂大破之。七年，除武衛將軍，儀同三司。九年，轉武
衛大將軍。乾明初，加車騎大將軍。皇建元年，封石城郡開國
伯，尋進爵為君。二年，除領左右大將軍，從肅宗討奚賊，大捷。
河清二年，突厥逼晉陽，勅猛將三百騎覘賊遠近，斬其驍將
落馬。三年，加驃騎大將軍。天統元年，奉世祖勅令在嗣主左
右，兼知內外機要之事。五年，除并省尚書左僕射，令領大將
軍，封山陽王。齊亡，入周，尋卒。

庾狄伏連，字仲山，少以武幹事。朱榮至直閣將軍。從高祖
建義，賜爵蛇丘男。世宗輔政，遷武衛將軍。天保初，儀同三司。
四年，除鄭州刺史。尋加開府，伏連質樸，勤於公事，直衛宮闕。

曉夕不離。帝由此見知。武平中封宜都郡王。除領軍大將軍。尋與瑯邪王儼矯殺和士開。伏誅。伏連家口有百數。盛夏之日。料以倉米二升。不給鹽菜。常有饑色。冬至日。親表稱賀。其妻為設豆餅。伏問此豆因何而得。妻對向以食馬豆中分減。充用。伏連大怒。典馬掌食之。并加杖罰。積年賜物。藏在別庫。遣侍婢一人。專掌管鑰。每入庫檢閱。必語妻子云。此是官物。不得輒用。至是簿錄并歸上府。

庾狄迴。洛代人也。少有武力。儀貌魁偉。初事尔朱榮為統軍。

預立莊帝。轉為別將。賜爵母極伯。從破葛榮。轉都督。榮死。尔

朱兆。高祖舉兵。信都迴。洛擁眾歸義。從破四胡於韓陵。以軍

功補都督。加後將軍。封順陽縣子。遷右廂都督。從征山胡。先

鋒斬級。除朔州刺史。破周文於河陽。轉授夏州刺史。邛山之

役力戰有功。增邑通前七百戶。世宗嗣事。從平潁川。天保初。除建州刺史。肅宗即位。封順陽郡王。大寧初。轉朔州刺史。食博陵郡幹。轉太子太師。遇疾卒。贈使持節都督定瀛恒朔雲五州軍事。大將軍。太尉公。定州刺史。侯莫陳相。代人也。祖伏額。魏第一領民酋長。父斛古提。朔州刺史。白水郡公。尋除蔚州刺史。仍為大行臺節度西道諸軍事。又遷車騎將軍。顯州刺史。入除太僕卿。頃之。出為汾州刺史。別封安次縣男。又始平縣公。天保初。除太師。轉司空。公進爵為白水王。累遷太傅。進食建州幹。別封義寧郡公。武平二年。四月。薨於州。年八十三。贈假黃鉞。使持節。督冀定瀛滄濟趙幽并朔恒十州軍事。右丞相。太宰。太尉公。朔州刺史。有二子。長子貴樂。尚公主。駙馬都尉。次子晉貴。武衛將軍。梁州刺史。

隆化時并州失守。晉貴遣使降周。授上大將軍。封信安縣公。
可朱渾元。字道元。自云遼東人。曾祖護野肱。為懷朔鎮將。遂
家焉。元寬仁有武略。少與神武相知。孝武帝立。累遷渭州刺
史。元既早為神武知遇。兼其母兄在東。恒表疏與神武往來。
周文帝有疑心。元乃率所部三千戶。發渭州西北度烏蘭津。
歷河源二州境。乃得東出。從靈州東北入雲州界。神武聞其
來。遣平陽太守高崇迎之。至晉陽。引見執手。賜帛千匹。并奴
婢田宅。其兄弟四人。先在并州者。胥進官爵。所部督將皆賞
以爵邑。封元縣公。除車騎大將軍。從討西魏。擒金祚。皇甫智
遷并州刺史。天保初。封扶風郡王。遷太師。薨。
斛律金。字阿六敦。朔州勅勒部人。高祖倍侯利道武時。內附。
賜爵孟都公。祖幡地斤。殿中尚書。父那瓌。光祿大夫。贈司空。

金性敦直善騎射行兵用匈奴法望塵知馬步多少嗅地知
軍度遠近初為軍主與懷朔鎮將楊鈞送茹茹主阿那瓌
見金射獵歎其工後瓌入寇高陸金拒擊破之正光末金附
破六韓拔陵假金王號金度陵終敗乃統所部詣雲州降
魏授第二領民酋長稍引南出黃瓜堆為杜洛周所破與兄
平脫身歸尔朱榮孝莊立賜爵阜城男及爾朱兆等逆亂神
武密懷匡復金贊成大謀太昌初為汾州刺史進爵為侯從
神武破紇豆陵於河西天太初遷鄴使金領步騎三萬鎮風
陵以備西寇軍罷還晉陽從高祖戰於沙苑不利班師元象
中周文帝復大舉向河陽神武率眾討之使金徑往太州為
犄角之勢金到晉州以軍退不行武定初北豫州刺史高仲
密據城西叛周文帝入寇洛陽神武使金統劉豐步大汗薩

等步騎數萬守河陽城以拒之。神武到仍從破密軍還。除大
司馬改封石城郡公。轉第一領民酋長。三年神武出軍襲山
胡分為二道以金為南道軍司。神武自出北道會於烏突戍。
合擊破之。軍還出為冀州刺史。世宗嗣事侯景據潁川降於
西魏。詔遣金帥潘樂薛孤延等固守河陽以備西魏。尋以功
別封安平縣男。顯祖受禪封咸陽郡王。刺史如故。肅宗踐阼
納其孫女為皇太子妃。又詔金朝見聽步挽車至階。世祖登
極禮遇彌重。又納其孫女為太子妃。金長子光大將軍次子
羨及孫武都並開府儀同三司出鎮方岳其餘子孫皆封侯
貴達一門一皇后二太子妃三公主尊崇之盛當時莫比。金
嘗謂子光曰我雖不讀書聞古來外戚梁冀等無不傾滅。女
若有寵諸貴人妬女若無寵天子嫌之。我家直以立勳抱忠

致富貴。豈可藉女也。辭不獲免。常以為憂。天統三年薨。年八十。世祖舉哀西堂。贈錢百萬。諡曰武子光嗣。斛律光字明月少工騎射。以武藝知名。魏末從金西征。周文帝長史莫孝暉時在行間。光馳馬射中之。因擒於陣。光時年十七。神武嘉之。即擢為都督。世祖為世子。引為親信。都督稍遷。征虜將軍。累加衛將軍。武定五年封永樂縣子。齊受禪。加開府儀同三司。別封西安縣子。天保三年從征出塞。光先驅破敵。多斬首虜。除晉州刺史。東有周天柱新安牛頭三戍。招引亡叛。屢為寇竊。七年光率步騎五千襲破之。九年又率眾取周絳川白馬澮文翼城等四戍。除朔州刺史。十年二月率騎一萬討周開府曹迴。公斬之。相谷城主儀同薛禹生棄城奔遁。遂取文侯鎮。立戍置柵而還。乾明元年除并州刺史。皇

建元年進爵鉅鹿郡公。時樂陵王百年為皇太子。肅宗以光世載醇謹，兼著勳王室，納其長女為太子妃。河清二年四月，光率步騎二萬，築勳掌城於軹關西，仍築長城二百里，置十三戍。三年正月，周遣將達奚成興等來寇平陽，詔光率步騎三萬禦之。興等聞而退走，光逐北，遂入其境，獲二千餘口而還。四月，率騎北討突厥，獲馬千餘匹。是年冬，周文帝遣其柱國大司馬尉遲迴、齊國公宇文憲、柱國庸國公可叱雄等衆稱十萬寇洛陽。光率騎五萬馳往，赴擊戰於邙山，迴等大敗。光親射雄殺之，斬捕首虜三千餘級。迴、憲僅而獲免，盡收其甲兵輜重，仍以死者積為京觀，策勳班賞，遷太尉。先是世祖命納光第二女為太子妃。天統元年拜為皇后，其年光轉大將軍。三年秋，除太保，襲爵咸陽王，并襲第一領民酋長十二

月周遣將圍洛陽。壅絕糧道。武平元年正月。詔光率步騎三萬討之。軍次定隴。周將張掖公宇文桀中州刺史梁士彥開府司水大夫梁景興等。又屯鹿盧。交道。光擐甲執銳。身先士卒。鋒刃纒交。桀衆大潰。斬首二千餘級。直到宜陽。與周將宇文憲揄跋顯敬相對十旬。光置桀統關。豐化二城。以通宜陽之路。軍還。行次安鄴。憲等衆號五萬。仍躡軍後。光縱騎擊之。憲衆大潰。虜其開府宇文英。都督越勤。世良。韓延等。又斬首三百餘級。憲仍令桀及其大將軍中部公梁洛都與景興。士彥等步騎三萬。於鹿盧交塞。斷要路。光與韓貴孫呼延族王顯等合擊。大破之。斬景興。獲馬千匹。詔加右丞相。并州刺史。其冬。光又率步騎五萬。於玉璧築華谷。龍門二城。與憲顯敬等相持。憲等不敢動。光乃進圍定陽。仍築南汾城。置州以逼。

之夷夏萬餘戶。並來內附。二年率衆築平隴。衛璧統戎等鎮戍十有三所。周柱國枹罕公普屯威柱國韋孝寬等步騎萬餘來逼平隴。與光戰於汾水之北。光大破之。俘斬千計。軍還。詔復令率步騎五萬出平陽道。攻姚襄白亭城。戍皆克之。獲其城主儀同大都督等九人。捕虜數千人。是月周遣其柱國紇干廣畧圍宜陽。光率步騎五萬赴之。大戰於城下。乃取周建安等四戍。捕虜千餘人而還。軍未至鄴。勅令便放兵散。光以為軍人多有勲功。未得慰勞。若即便散。恩澤不施。乃密通表請使宣旨。軍仍且進。朝廷發使遲留。軍還將至紫陌。光仍駐營待使。帝聞光軍營已逼。心甚惡之。急令舍人追光入見。然後宣勞散兵。拜光左丞相。光入常在朝堂垂簾而坐。祖珽不知乘馬過其前。光怒。謂人曰。此人乃敢爾。後珽在內省言。

聲高慢。光適過。聞之。又怒。珽知光忿已。賂光從奴而問之曰。相王瞋孝徵耶。曰。自公用事。相王每夜抱膝歎曰。盲人入國。必破矣。穆提婆求娶光庶女。不許。帝賜提婆晉陽之田。光言於朝曰。此田神武帝以來常種禾。飼馬數千匹。以擬寇難。今賜提婆。無乃闕軍務也。由是祖穆積怨。周將軍韋孝寬忌光英勇。乃作謠言。令間牒漏其文於鄴曰。百升飛上天。明月照長安。又曰。高山不推自崩。榭樹不扶自豎。祖珽因續之曰。盲眼老公背上下大斧。饒舌老母不得語。令小兒歌之於路。提婆聞之。以告其母。令萱萱以饒舌斥已也。盲老公謂珽也。遂相與協謀。以謠啟帝曰。斛律累世大將。明月聲震關西。豐樂威行突厥。女為皇后。男尚公主。謠言甚可畏也。帝以問韓長鸞。鸞以為不可事。寢祖珽。又見帝請間。唯何洪珍在側。帝曰。

前得公啟。即欲施行。長鸞以為無此理。珽未對。洪珍進曰。若本無意。則可。既有此意。而不決行。萬一泄露。如何。帝曰。洪珍言是也。猶豫未決。會丞相府佐封士讓密啟云。光前西討。還勅令放兵散。光令軍逼帝京。將行不軌。事不果而止。家藏弩甲奴僮千數。每遣使豐樂武都處。陰謀往來。若不早圖。恐事不可測。啟云。軍逼帝京。會帝前所疑意。謂何。洪珍云。人心亦大聖。我前疑其欲反。果然。帝性至怯。懼恐。即變發。令洪珍馳召祖珽。告之。又恐。追光不從命。珽因云。正爾召之。恐疑不肯入。宜遣使賜其一駿馬。語云。明日將往東山遊觀。王可乘此馬同行。光必來奉謝。因引入執之。帝如其言。頃之。光至。引入涼風堂。劉桃枝自後拉而殺之。時年五十八。光自結髮從戎。未嘗失律。深為隣敵所懾。周武帝聞光死。大喜。赦其境內。

後入鄴。追贈上柱國公。指詔書曰：此人若在，朕豈能至鄴。斛律羨，字豐樂，金次子。少有機警，尤善射藝。高祖見而稱之。河清三年，轉幽州刺史。其年秋，突厥衆十餘萬來寇州境。羨總率諸將禦之。突厥望見軍威，其整遂不敢戰。即遣使求款。慮其有詐，且喻之曰：爾輩此行本非朝貢，見機始變。未是宿心。若有實誠，宜速歸巢穴。別遣使來。於是退走。天統元年夏五月，突厥木汗遣使請朝獻。羨始以聞。自是朝貢歲時不絕。羨有力焉。詔加行臺僕射。羨以北虜屢犯邊，須備不虞。自庫堆戍東，拒於海，隨山屈曲二千餘里。其間二百里中，凡有險要，或斬山築城，或斷谷起障，並置立戍邏五十餘所。又導高梁水北，合易京東，會於潞。因以灌田。邊儲歲積，轉漕用省。公私獲利焉。武平元年，加驃騎大將軍。時光子武都為兗州刺

史羨。歷事數帝。以謹直見推。雖極榮寵。不自矜尚。至是以合
門貴盛。深以為憂。乃上書推讓。乞解所職。優詔不許。其年秋
進爵荆山郡王。三年七月。光誅勅使中領軍賀拔伏恩等十
餘人。驛捕之。死於長史廳。事臨終。歎曰。富貴如此。女為皇后。
公主滿家。常使三百兵。何得不敗。羨及光並少工騎射。其父
母日令其出畝。還即較所獲禽獸。光所獲或少。必麗龜達腋。
羨雖獲多。非要害之所。光常蒙賞羨。或被捶撻。人問其故。金
答云。明月必背。上着箭。豐樂隨處。即下手。其數雖多。去兄遠
矣。聞者咸服其言。金兄平。便弓馬。有幹用。魏正光末。六鎮擾
亂。隸大將軍尉賓。北討軍敗。為賊所虜。後走奔。其弟金於雲
州。與金擁衆南出。至黃瓜堆。為杜洛周所破。部落離散。及歸
尔朱榮。待之甚厚。以平襲父爵第一領民酋長。高祖起義。以

都督從稍遷平北將軍。顯州刺史。加鎮南將軍。封固安縣伯。
尋進為侯。行肆州刺史。周文帝遣其右將軍李小光據梁州。
平以偏師討擒之。出為燕州刺史。入兼左衛將軍。領衆一萬。
討北徐賊。破之。除濟州刺史。侯景度江。詔平為大都督。率青
州刺史敬顯雋、左衛將軍庫狄伏連等略定壽陽。宿預三十
餘城。事罷。還州。進爵為公。顯祖受禪。別封羨陽侯。行兗州刺
史。以黷貨除名。後為青州刺史。卒。贈太尉。
步大汗薩太安狄那人。正光末。六鎮反亂。薩將家避難南下。
奔尔朱榮於秀容。後從榮入洛。以軍功除揚武軍帳內統軍。
賜爵江夏子。從平葛榮。累前後功。加鎮南將軍。榮死。後從尔
朱兆入洛。補帳內大都督。兆敗。薩以所部降高祖。以為第三
領民酋長。累遷秦州鎮城都督。北雍州刺史。天平中。轉東壽

陽三泉都督元象中。行燕州。累遷臨川領民大都督。賜爵長
廣伯。時茹茹寇鈔。屢為邊害。高祖撫納之。遣薩將命。還拜儀同
三司。出為五城大都督。鎮河陽。進封行唐縣公。齊受禪。改封
義陽郡公。

王紘。字師羅。太安狄那人。父基。頗讀書。有智略。元象初。累遷
南益州北豫州刺史。紘少好弓馬。善騎射。頗愛文學。性機敏。
應對便捷。年十三。見揚州刺史太原郭元貞。撫其背曰。汝讀
何書。對曰。孝經。曰。孝經云。何曰。在上不驕。為下不亂。元貞曰。
吾作刺史。豈其驕乎。紘曰。公雖不驕。君子防未萌。亦願留意。
元貞稱善。年十五。隨父在北豫州行臺。侯景與人論掩衣法。
為當左。為當右。尚書敬顯儁曰。孔子云。微管仲。吾其被髮左
衽矣。以此言之。右衽為是。紘進曰。國家龍飛朔野。雄步中原。

五帝異儀。三王殊制。掩衣左右。何足是非。景奇其早慧。賜以名馬。興和中。世宗召為庫直。除奉朝請。世宗暴崩。紘冒刃捍禦。以忠節。賜爵平春縣男。河清三年。與諸將征突厥。加驃騎大將軍。武平初。紘上言。突厥與宇文弼來。女往。必當相與。影響南北。寇邊宜。選九州勁勇。彊弩。多據要險之地。天下幸甚。五年。陳人寇淮南。詔令羣臣共議禦捍。紘曰。官軍頻經失利。人情騷動。若復興兵。極武出頓。江淮恐北狄西寇。乘我之弊。傾國而來。則世事去矣。莫若薄賦省徭。息民養士。使朝廷協睦。遐邇歸心。天下皆當肅清。豈直偽陳而已。高阿那肱謂衆人曰。從王武衛者。南席衆皆同焉。尋兼侍中。聘於周。使還。即正。未幾而卒。紘好著述。鑒誡二十四篇。頗有文義。

徐遠。字彥遐。廣寧石門人。少習吏事。郡辟功曹。未幾與太守

率戶赴義旗。署防城都督。除廩陶縣令。高祖以遠嬖。習書計。命為丞相騎兵參軍事。常從征伐。克濟軍務。深為高祖所知。累歷鉅鹿陳留二郡太守。天保初。為御史。所劾遇赦。免。顯祖用為軍府長史。累遷東徐州刺史。入為太中大夫。河清初。加衛將軍。二年。除使持節都督東楚州諸軍事。東楚州刺史。武平初卒。

傅伏。太安人。少從戎。以戰功稍至開府。永橋領人大都督。周武帝前攻河陰。伏自永橋夜入中潭城南。城陷。被圍二旬。不下。救兵至。周師還。後除東雍州刺史。周剋晉州。執行臺尉相。貴。招伏。伏不從。周剋并州。遣韋孝寬以伏子世寬來招伏。授上大將軍。武鄉郡公。即給告身。以金瑪瑙二酒鍾為信。伏不受。曰。事君有死。無二。此兒為臣。不能竭忠。為子不能盡孝。人

所讐疾願即斬之以號令天下周武自鄴還至晉州遣高阿
那肱等至臨汾召伏伏聞後主已被獲仰天大哭率衆入城
於廳事前北面哭良久然後降周武詰之伏流涕曰臣三世
衣食齊家被任如此革命不能自死羞見天地周武親執手
曰為臣當若此朕平齊唯見公一人授上儀同賞謂後主曰朕
前三年決意取河陰正為傳伏不可動公當時授何其薄也
賜伏金酒卮後為岷州刺史卒

案齊神武帝高歡家懷朔故佐命多朔人斛律氏本傳朔
州勅勒部人考魏書地形志朔州領郡五其神武郡領尖
山殊顏二縣在今薩縣界勅勒降人附塞而居所謂勅勒
川陰山下者其地當在今土默特旗右翼轄境內山西舊
志列光父子於朔州今朔縣誤矣

↑北周

宇文護字薩保代武川人周太祖之兄邵惠公顥之少子幼
方正有志度太祖入關以年少不從魏普泰初始自晉陽至
平涼時年十七太祖諸子並幼遂委護以家務內外無不嚴
肅太祖以為類己初為都督封水池縣伯大統十二年進封
中山公十五年遷大將軍拜小司空太祖西巡至牽屯山遇
疾召護至涇州曰吾形容若此必不濟諸子幼天下事以屬
汝護涕泣奉命行至雲陽而太祖崩護秘之至長安乃發喪
時嗣子沖幼強寇在遷人情不安護綱紀內外循撫文武衆
心乃定尋拜柱國太祖山陵畢護遣人諷魏帝遂行禪代之
事孝閔踐阼拜大司馬封晉國公拜大冢宰尋弒帝迎明帝
立之二年拜太師賜輅車冕服金石之樂武成元年護上表

歸政。帝許之。軍國大事尚委於護。帝性聰睿，有識量。護深憚之。乃遣膳部下大夫李安進食，加毒。帝遂崩。護立武帝左右十二軍，皆受護處分。凡微發非護書，不行事。無巨細，皆先斷。後聞保定元年，以護為都督中外諸軍事。三年，詔自今詔誥及百官文書，並不得稱公名，以彰殊禮。先是，護母閭姬與皇第四姑及諸戚屬，並沒在齊，皆被幽繫。護居宰相後，每遣間使尋求，莫知音息。至是，並許還朝。且請和好。四年，皇姑先至。齊主以護權重，乃留其母，以為後圖。後母至，舉朝慶悅。大赦天下，每四時伏臘，武帝率諸親戚行家人禮，稱觴上壽，榮貴之極。振古未聞。天和二年，護母薨。五年，詔賜護軒懸之樂。六佾之舞。護性甚寬和，然暗於大體，自恃建立之功，久當權軸。所任皆非其人，兼諸子貪殘，僚屬縱溢，莫不蠹政害人。帝以

其暴慢。密與衛王直圖之。七年三月十八日。護自同州還。帝御文安殿。見護。引入含仁殿。帝以玉珽自後擊之。踣地。衛王直由戶內出。斬之。并殺護諸子及同黨。暴其罪。建德三年。詔復護及諸子先封諡。護曰蕩。並改葬之。

楊纂。廣寧人。父安仁。魏北道都督。朔州鎮將。纂少習軍旅。慷慨有志略。尤工騎射。勇力兼人。年二十。從齊神武起兵於信都。以軍功。稍遷安西將軍。武州刺史。自以功高。賞薄。志懷怨憤。每歎曰。大丈夫富貴。何必故鄉。若以妻子撓懷。豈不沮人雄志。大統初。乃間行歸款。太祖即授征南將軍。大都督。封永興縣侯。從太祖解洛陽圍。經河橋。邛山之戰。纂每先登。軍中咸推其敢勇。累遷驃騎大將軍。開府儀同三司。加侍中。進爵為公。賜姓莫胡盧氏。授岐州刺史。孝閔帝踐阼。進爵宗熙郡。

公保定元年進位大將軍改封隴東郡公除隴州刺史三年
從隋公楊忠東伐至并州而還天和六年轉華州刺史纂性
質樸又不識文字前後蒞職但推誠信而已吏人以其忠恕
頗亦懷之尋卒於州

庫狄昌字恃德神武人少便弓馬有膂力及長進止閑雅膽
氣壯烈每以將帥自許年十八從爾朱天光定關中以功拜
寧遠將軍天光敗又從賀拔岳授征西將軍岳被害昌與諸
將翊戴太祖從平侯莫陳悅賜爵陰盤縣子後從太祖迎魏
孝武入潼關改封長子縣子大統初進爵為公後以軍功累
遷至開府儀同三司進方城郡公孝閔帝踐阼拜大將軍後
以疾卒

宇文深字奴于代武川人性鯁正有器局年數歲便累石為

營。布。置。行。伍。皆。有。軍。陣。之。勢。父。永。遇。見。之。喜。曰。汝。自。然。知。此。
後。必。為。名。將。孝。武。西。遷。事。起。倉。卒。深。時。為。子。都。督。領。宿。衛。兵。
撫。循。所。部。並。得。入。關。以。功。賜。爵。長。樂。縣。伯。大。統。中。累。轉。尚。書。
直。事。郎。中。及。齊。神。武。屯。蒲。坂。分。遣。其。將。竇。泰。趨。潼。關。高。敖。曹。
圍。洛。州。周。文。帝。將。襲。秦。諸。將。咸。難。之。問。策。於。深。深。曰。竇。氏。高。
歡。驍。將。每。仗。之。禦。侮。今。大。軍。就。蒲。坂。則。歡。必。拒。守。竇。必。援。之。
內。外。受。敵。取。敗。道。也。不。如。選。輕。銳。潛。出。小。關。竇。性。躁。急。必。來。
決。戰。高。歡。持。重。未。即。救。之。則。竇。可。擒。也。迴。師。禦。歡。可。以。制。勝。
文。帝。喜。曰。是。吾。心。也。軍。遂。行。果。獲。秦。齊。神。武。亦。退。深。又。說。帝。
進。取。弘。農。復。尅。之。文。帝。大。悅。謂。深。曰。君。即。吾。家。陳。平。也。是。冬。
齊。神。武。又。率。大。衆。至。沙。苑。諸。將。皆。懼。惟。深。獨。賀。文。帝。問。其。故。
對。曰。歡。撫。河。北。甚。得。衆。心。以。此。自。守。未。易。可。圖。今。懸。師。渡。河。

非衆所欲。唯歡恥失竇氏。復諫而來。所謂忿兵一戰可擒也。
文帝然之。尋大破齊軍。果如所策。俄進爵為侯。武成元年。改
封安化縣公。保定初。除京兆尹。入為司會中大夫。深少喪父。
事兄甚謹。性多奇譎。好讀兵書。既居近侍。每進籌策。及在選
曹。頗有時譽。性仁愛。從弟神舉。神慶。幼孤。深撫訓之。義均同
氣。卒於位。諡曰成康子孝伯。
宇文神舉。早孤。有夙成之量。及長。神情倜儻。志略英贍。明帝
初起家中。侍上士。帝每游幸。神舉恒從。襲爵長廣縣公。天和
元年。累遷右宮伯中大夫。進爵清河郡公。建德三年。自京兆
尹出。為熊州刺史。齊人憚其威名。及帝東伐。從平并州。即授
刺史。州既齊氏別都。多有姦猾。神舉示以威恩。遠近悅服。改
封武德郡公。進柱國大將軍。又改封東平郡公。宣政元年。討

禽盧昌期于范陽。時齊黃門侍郎盧思道亦在反中。賊平將解衣伏法。神舉乃釋而禮之。即令草露布屬稽胡反寇西河。神舉與越王盛討之。突厥赴救。神舉以奇兵擊敗之。稽胡款服。即授并州總管。神舉見待於武帝。處心腹之任。王軌字文孝。伯等屢言皇太子之短。神舉亦頗預焉。及宣帝即位。神舉懼及禍。懷不自安。初定范陽之後。威聲甚振。帝亦忌其名望。兼以宿憾。使人齎醢酒賜之。薨於馬邑。時年四十八。神舉美風儀。善辭令。博涉經史。性愛篇章。尤工騎射。臨戎對寇。勇而有謀。莅職當官。每著聲績。兼好施愛士。以雄豪自居。故得任兼文武。聲彰內外。子嗣位。至儀同大將軍。

趙貴字元寶。天水南安人。祖仁以良家子鎮武川。因家焉。貴少有節概。朱榮以為別將。從討元顥有功。賜爵燕樂縣子。

從賀拔岳平關中。累遷大都督。岳為侯莫陳悅所害。貴謂其黨曰：朱伯厚、王修感意氣微，恩尚能蹈履名節。况吾等荷賀拔公國士之遇，寧可自同衆人乎？從之者五十人。乃詣悅詐降。因請收葬岳。悅壯而許之。還與寇洛等奔平涼。共圖拒悅。貴乃首議迎周文帝。周文至，以貴為大都督、領府司馬。悅平。行秦州事。後為隴西行臺。討梁公定，破之。從復弘農、沙苑。進爵中山郡公。邛山之戰，貴為左軍，失律，坐免官。尋復官。爵拜柱國大將軍，賜姓乙弗氏。改封南陽郡公。周孝閔帝踐阼，遷大冢宰。進封楚國公。初，貴與獨孤信等皆與文帝等夷。及晉公護攝政，貴自以元勳，每懷怏怏。與信謀殺護，為開府。宇文盛告被誅。

韓果，字阿六拔代武，川人。少驍雄，善騎射。賀拔岳引為帳內。

後從周文討平侯莫陳悅。大統初，累進爵石城公。果性強記，兼有權略，善伺敵虛實，揣知情狀，有潛匿溪谷欲為間偵者，果登高望之，所疑處，往必有獲。周文由是以果為虞侯都督，每從征行，常領候騎，晝夜巡察，略不眠寢。從平竇泰，又從復弘農，破沙苑，戰河橋，並有功。歷朔安二州刺史，從戰邛山，軍還，除河東郡守。又從大將軍破稽胡於北山，進兵窮討，散其種落，稽胡憚果勁捷，號為著翅人。周文聞之，笑曰：「著翅之名，寧減飛將？」累遷開府儀同三司，進爵褒中郡公。保定三年，拜少師，進位柱國。天和初，授華州刺史，為政寬簡，吏人稱之。薨。子明嗣，為黎州刺史，與尉遲迴同謀反，被誅。賀蘭祥，字盛樂，其先與魏俱起，有乞伏者，為賀蘭。莫何弗因，以為氏。後有以良家子鎮武川者，遂家焉。祥年十一而孤，居

喪合禮。長於舅氏。特為周文帝所愛。雖在戎旅。博延儒生。教以書傳。周文初入關。祥與晉公護俱在晉陽。後乃遣使迎致之。解褐奉朝請。少有膽氣。志在立功。尋擢補都督。從平侯莫陳悅。又迎魏孝武。以前後功。封撫夷縣伯。從擊潼關。獲東魏將薛長儒。攻回洛。拔之。拜左右直長。進爵為公。大統九年。從周文與東魏戰於邛山。進位驃騎大將軍。開府儀同三司。加侍中。十四年。除都督荊州刺史。進爵博陵郡公。先是祥嘗行荊州事。雖未暮月。頗有惠政。至是重往。百姓安之。漢南流人襁負至者。日有千數。遠近蠻夷。莫不欵附。祥隨機撫納。咸得歡心。性清素。時與梁通好。公私贈遺。一無所受。梁雍州刺史岳陽王蕭詧。欵其風素。乃以竹屏風。絺綌之屬。及經史贈之。祥難違其意。取付所司。周文後聞之。竝以賜祥。十六年。拜大

將軍周文以涇渭溉灌之處渠堰廢毀乃令祥修造富平堰開渠引水東注於洛人獲其利魏廢帝二年行華州事後改華州為同州仍以祥為刺史尋拜尚書左僕射周孝閔帝踐阼進位柱國大司馬時晉公護執政與祥中表少相親愛軍國之事皆與參謀武成初吐谷渾侵涼州郡召祥與宇文貴總兵討之拔洮陽洪和二城振旅而還進封涼國公薨贈太師同岐等十二州諸軍事同州刺史諡曰景

宇文貴字永貴其先昌黎大棘人徙居夏州貴少從師受學嘗輟書歎曰男兒當提劍汗馬以取公侯何能如先生為博士也魏正光末破六韓拔陵圍夏州刺史源子雍嬰城固守以貴為統軍救之前後數十戰軍中咸服其勇後送子雍還又擊破賊帥叱干麒麟薛崇禮等除武騎常侍又從子雍討

葛榮為榮所圍。賊屢來攻。貴每鎧而出戰。賊莫敢當其鋒。然圍久不解。貴乃於地道潛出。北見介朱榮。陳賊兵勢。榮深納之。因從榮擒葛榮於滏口。加別將。後為武衛將軍。關內大都督。從魏孝武西遷。進爵化政郡公。大統初。遷右衛將軍。貴善騎射。有將帥才。太祖又以宗室甚親。委之。三年。進車騎大將軍。儀同三司。與獨孤信入洛陽。東魏潁州刺史賀若統據潁川來降。東魏遣其將堯雄、趙育是。云寶率衆二萬攻潁。貴自洛陽率步騎二千救之。軍次陽翟。雄等已度馬橋去潁川三十里。東魏行臺任祥又率衆四萬餘與雄合。諸將咸以彼衆寡。寡不可爭鋒。貴曰。兵機倚伏。固不可以常理論。古人能以寡制衆者。皆由預覩成敗。決必然之策耳。吾進據潁川。有城可守。雄見吾入城。出其不意。進則孤疑。退則不可。然後與諸

軍盡力擊之。何往不克。願勿疑也。遂入潁川。雄等稍前。貴率千人背城為陳。與雄合戰。貴馬中流矢。乃短兵步鬪。士衆用命。雄大敗。輕騎走。趙育於陳降。獲其輜重。俘萬餘人。盡放。令還。任祥聞雄敗。遂不敢進。尋而儀同怡峯率騎五百赴貴。貴乘勝逼祥。祥退保宛陵。追及之。會日暝。結陳相持。明旦合戰。俘斬甚多。祥軍既敗。是云寶亦降。師還。魏文帝在天遊園。以金卮置侯上。命公卿射中者。即以賜之。貴一發而中。帝笑曰。由基之妙。正當爾耳。進侍中。驃騎大將軍。開府儀同三司。歷夏岐二州刺史。十六年。遷中外府左長史。進位大將軍。孝閔帝踐阼。進位柱國。拜御正。中大夫。武成初。與賀蘭祥討吐谷渾。軍還。進封許國公。舊爵迴封一子。貴好音樂。耽奕碁。留連不倦。然好施愛士。時人頗以此稱之。保定末。使突厥迎皇后。

天和二年還至張掖。薨。贈太傅。謚曰穆。
侯莫陳崇字尚樂。代武川祖元。以良家子鎮武川。因家焉。崇
少驍勇。善騎射。謹愨。少言。年十五。隨賀拔岳與尔朱榮征葛
榮。後從岳入關。破赤水蜀。又從岳力戰。破万俟醜奴。崇單騎
入賊中。於馬上生擒醜奴。遂大破之。封臨涇縣侯。及岳為侯
莫陳悅所害。崇與諸將同謀迎周文帝。文帝至軍。原州刺史
史歸猶為悅守。周文遣崇襲歸。直到城下。即據城門。時李遠
兄弟在城內。先知崇來。中外鼓譟。伏兵悉起。遂擒歸。斬之。以
崇行原州事。仍從平悅。別封廣武縣伯。累遷儀同三司。從擒
竇泰。復弘農。破沙苑。戰河橋。又別討平稽胡。累戰皆有功。進
柱國大將軍。拜大司空。周孝閔踐阼。進封梁國公。加太保。保
定三年。宇文護遣使將兵就崇宅。逼令自殺。謚曰躁。護誅。改

謚曰莊閔。

崇兄順少豪俠有氣度。初為介朱榮統軍。普泰元年封木門縣子。從孝武入關。順與周文帝同里閭。素相友善。弟崇又先在關中。周文見之甚歡。進爵彭城郡公。及梁公定圍逼河州。以順為大都督討破之。即行河州事。大統四年。魏文帝東討。順與太尉王盟、僕射周惠達等留鎮長安。時趙青雀反。盟及惠達奉魏太子出次渭北。順於渭橋與賊戰。頻破之。魏文帝還。執順手曰：「渭橋之戰，卿有殊功，便解所服金鏤玉梁帶賜之。」南岐州氏羌符安壽遂率部落一千家款附。改封順河間郡公。六年加驃騎大將軍、開府儀同三司。行西夏州事。改平原郡公。周孝閔帝踐阼，拜少師。進位柱國。其年薨。獨孤信，雲中人，本名如願。祖侯尼。魏和平中，以良家子自雲。

中鎮武川。因家焉。父庫者為領人酋長。信美容儀。善騎射。正光末。與賀拔度等同斬衛可瓌。由是知名。後為葛榮所獲。信既少年。自修飾服章。軍中號為獨孤郎。及尔朱氏破葛榮。以信為別將。後以破元顥黨。賜爵受德縣侯。遷武衛將軍。賀拔勝出鎮荊州。乃表信為大都督。及孝武西遷。事起倉卒。信單騎及之於灑澗。孝武歎曰。武衛遂能辭父母。捐妻子。從我。世亂。識忠良。豈虛語哉。進爵浮陽郡公。時荊州雖陷。東魏人心猶戀本朝。乃以信為衛大將軍。都督三荊州軍事。兼尚書右僕射。東南道行臺大都督。荊州刺史。以招懷之。大統六年。除隴右十一州大都督。秦州刺史。在州事無壅滯。示以禮教。勸以耕桑。數年之中。公私富實。流人願附者數萬家。周文以其信著遐邇。故賜名為信。十三年。移鎮河陽。十四年。進柱國。大

將軍十六年遷尚書令拜大司馬周孝閔帝踐阼遷大宗伯
進封衛國公邑萬戶趙貴誅後信以同謀坐免居無幾宇文
護逼令自盡於家時年五十五信美風度雅有奇謀大略周
文初起霸業唯有關中之地以隴右形勝故委信鎮之既為
百姓所懷聲震鄰國信長女周明敬后第四女元貞后第七
女隋文獻后三代皆為外戚自古未有也

赫連達字朔周盛樂人勃勃之後也曾祖庫多汗因避難改
姓杜氏達性剛鯁有膽力少從賀拔岳討有功拜都將賜爵

長廣鄉男及岳為侯莫陳悅所害趙貴建議迎周文達贊成

其議請輕騎告周文仍迎之諸將或欲南追賀拔勝或云東

告朝廷達又曰此皆遠水不救近火何足道哉謀遂定孝武

入關進魏昌縣伯破曹泥復弘農戰沙苑皆有功詔復姓赫

連除雲州刺史。進爵為公。保定初，為大將軍、夏州總管。達雖非文吏，然性質直，遵奉法度，輕於鞭撻，而重慎死罪。性又廉儉，邊境胡人或饋羊，達報以繒帛。主司請用官物，達曰：「羊入我厨，物出官庫，是欺上也。」命取私帛與之。識者嘉其仁恕。尋進爵樂川郡公。位柱國，薨。

閻慶，字仁度，河陰人。曾祖善仕，魏歷龍驤將軍、雲州鎮將。因家雲州之盛樂郡。祖提，持節車騎大將軍、敦煌鎮都大將。父進，有謀略，勇冠當時。正光中，拜龍驤將軍、屬衛可瓌。作亂，攻圍盛樂，進率眾拒守，以功拜盛樂郡守。慶幼聰敏，重然諾，風儀端肅，望之儼然。隨父固守盛樂，頗有力焉。拜別將。後以軍功拜步兵校尉中堅將軍。既而齊神武舉兵入洛，魏孝武西遷，慶以大統三年自宜陽歸闕，稍遷後將軍，封安次縣子。以

功進爵為伯。慶善於撫綏，士卒未休，未嘗先舍，故能盡其死力。屢獲勲勞，累遷散騎常侍、驃騎大將軍、開府儀同三司、雲州大中正，加侍中，賜姓大野氏。周孝閔踐阼，出為河州刺史，進爵石保縣公。州居河外地，接戎夷，慶留心撫綏，頗稱簡惠。就拜大將軍，進爵太安郡公。入為小司空，歷雲、寧二州刺史。慶性寬和不苛察，百姓悅之。天和五年，進位柱國。宇文護母，慶之姑也。護雖擅朝，而慶未嘗阿附。及護誅，武帝以此重之。詔第十二子毗尚帝女清都公主。慶雖位望隆重，婚連帝室，常以謙慎自守。時以此稱之。建德二年，致仕，拜上柱國。隋開皇二年，薨，年七十七，贈司空，諡曰成。

李和本，名慶和，其先隴西狄道人。後徙居朔方。父僧養，以累世雄豪，善於統御，為夏州酋長。和少勇敢，有識度，賀拔岳作

鎮關中引和為帳內都督以破諸賊功稍遷征北將軍賜爵
思陽公尋除漢陽郡守治存寬簡百姓稱之至大統初加車
騎大將軍儀同三司夏州刺史賜姓宇文氏太祖嘗謂諸將
曰宇文慶和智略明瞻立身恭謹累經委任每稱吾意遂賜
名意焉改封永豐縣公保定二年除司憲中大夫進爵義城
郡公尋又改封德廣郡公出為洛州刺史和前在夏州頗留
遺惠及有此授商洛父老莫不想望德音和至州以仁恕訓
物獄訟為之簡靜天和六年進柱國大將軍建德元年改授
延綏銀三州文安伏夷安民周昌梁和五防禦諸軍事隋開
皇元年遷上柱國和立身剛簡老而愈勵諸子趨事若奉嚴
君二年薨贈本官加司徒公諡曰肅
達奚武字成興代人也祖眷魏懷荒鎮將父長沂城鎮將武

少倜儻。好馳射。為賀拔岳所知。岳征關右。引為別將。武遂委心事之。以戰功拜羽林監。子都督。及岳為侯莫陳悅所害。武與趙貴收岳屍歸平涼。同翊戴太祖。從平悅。除中散大夫。都督封須昌縣伯。魏孝武入關。轉大丞相府中兵參軍。大統初。出為東秦州刺史。進爵為公。齊神武與竇泰、高敖曹三道來侵。太祖欲并兵擊竇泰。諸將多異議。唯武及蘇綽同意。遂擒之。齊神武乃退。齊神武趣沙苑。太祖遣武覘之。武從三騎。皆衣敵衣。至日暮。去營百步。下馬潛聽。得其軍號。因上馬歷營。具知敵之情狀。以告太祖。太祖深嘉焉。遂從破之。除大都督。進爵高陽郡公。四年。太祖援洛陽。武為前鋒。至穀成。與李弼破莫多婁。貸文進至河橋。斬其司徒高敖曹。遷侍中。驃騎大將軍。十七年。詔武率兵三萬。經略漢川。明年。武振旅還京師。

朝議初欲以武為柱國。武謂人曰：我作柱國，不應在元子。孝
前固辭不受。以大將軍出鎮玉壁。武乃量地形勝，立樂昌胡
營、新城三防。齊將高彥子以千騎攻新城，武邀擊之，悉擄其
衆。孝武帝踐阼，拜柱國、大司寇。保定三年，遷太保。五年十月
薨，年六十七。贈太傅，諡曰桓子震嗣。

宇文盛，字保興，代人也。曾祖伊與敦，祖長壽，父文孤，并為沃
野鎮軍主。盛志力驍雄，初為太祖帳內，從破侯莫陳悅，授威
烈將軍，封漁陽縣子。大統三年，從擒竇泰，復弘農，破沙苑，授
都督、平遠將軍，進爵為公。累遷大都督、車騎大將軍、儀同三
司、驃騎大將軍、鹽州刺史。及楚公趙貴謀為亂，盛密赴京告
之，貴誅。授大將軍，進爵忠城郡公。除涇州都督，仍從賀蘭祥
平洮陽，洪和二城，別封一子甘棠縣公。進位柱國。天和五年。

入為太宗伯。六年，與柱國王傑從齊公憲東討。時汾州被圍，日久，憲遣盛運粟以給之，仍赴姚襄城。受憲節度，齊將段孝先率兵大至，盛力戰拒之。孝先退，乃築大寧城而還。建德五年，從高祖東伐，率步騎一萬守汾水關。宣帝即位，拜上柱國、大冢中薨子述嗣。

伊婁穆，字奴干，代人也。父靈善騎射，為太祖所知。太祖嘗謂之曰：昔伊尹保衡於殷，致主堯舜，卿既姓伊，庶卿不替前緒。於是賜名尹焉。穆弱冠為太祖帳內親信，以機辯見知。邠山之役，力戰有功，累遷撫軍將軍、大都督、通直散騎常侍。嘗入白事，太祖望見，悅之，字之曰奴干，作儀同。面見我矣。於是拜車騎大將軍，儀同三司，賜封安陽縣伯，轉大丞相府掾。除給事黃門侍郎。魏廢帝二年，穆使於蜀，屬五城郡人趙雄傑與

梓潼郡人王令公鄧肱等構逆。衆三萬餘人，阻涪水立柵。進逼潼州。穆遂與刺史叱羅協率兵破之。孝閔帝踐阼，進爵為侯。尋進位驃騎大將軍，開府儀同三司。保定四年，除金州總管。八州諸軍事。天和二年，又為民部中大夫。衛公直出鎮襄州，以穆為長史。郢州城民王道骨反，襲據州城。直遣穆率百餘騎馳往援之。穆至城下，頻破骨衆。會大將軍高琳率衆軍繼進，骨等乃降。唐州山蠻恃險逆命，穆率軍討之。旬有四日，破石窟十四處，虜獲六千五百人。六年，進位大將軍。建德初，授荊州。復以穆為總管府長史。五年，從皇太子討吐谷渾。還。穆殿為渾人圍，會劉雄救至，乃得解。後以疾卒。

梁椿，字千年代人也。初以統軍從尒朱榮入洛。復從榮破葛榮於塗口，以功進授都將。後從賀拔岳討平万俟醜奴、蕭寶

夤等遷中堅將軍屯騎校尉子都督普泰初拜征西將軍二年除高平郡守封盧奴縣男大昌元年從太祖平侯莫陳悅拜衛將軍大統初進爵欒城縣伯出為隴東郡守尋進爵為公從復弘農戰沙苑與獨孤信入洛陽從宇文貴破東魏將姚雄等累有戰功授車騎大將軍儀同三司大都督從戰河橋進爵東平郡公俄遷侍中驃騎大將軍開府儀同三司七年從于謹討稽胡劉平伏擒其別帥劉持塞又從獨孤信討岷州羌梁企定破之除清州刺史在州雖無他政績而夷夏安之孝閔帝踐阼除華州刺史改封清陵郡公二年入為少保轉少傅保定元年拜大將軍卒於位諡曰烈椿性果毅善於撫納所獲賞物分賜麾下故每踐敵場能得其死力雅好儉素不營貲產時論以此稱焉

陸騰字顯聖，代人也。少慷慨，有大節。解中員外散騎侍郎、司
徒府中兵參軍。朱榮入洛，以騰為通直散騎侍郎，帳內都
督。從平葛榮，以功賜爵清河縣伯。普泰初，遷朱衣直閤尚安
平主，即東萊王貴平女也。魏孝武幸貴平第，見騰與語，悅之。
謂貴平曰：「阿翁真得好婿。」即擢為通直散騎常侍。及孝武西
遷，騰時使青州，遂沒於鄴東。魏興和初，徵拜征西將軍，領陽
城郡守。大統九年，大軍東討，以騰所據險要，遂先攻之。拒守
月餘，城陷，被執。太祖釋而禮之，拜帳內大都督。未幾，除太子
庶子，遷武衛將軍。既為太祖所知，願立功效，不求內職。太祖
嘉之。魏廢帝元年，安康賊黃衆寶等作亂，連結漢中衆數萬，攻
圍東梁州。城中糧盡，詔騰率軍自子午谷以援之。騰乃星夜攻
就道，至便與戰，大破之。軍還，拜龍州刺史。太祖謂騰曰：「今欲

通江由路直出南奏。卿宜善思經略。騰曰必望臨機制變。未敢預陳。太祖曰此是卿取柱國之日。卿其勉之。州民李廣嗣、李武等據險為堡壁。攻劫郡縣。歷政不能治。騰密令多造飛梯。身率麾下夜往掩襲。未明四面俱上。遂破之。執廣嗣等於鼓下。其黨有任公忻者更聚衆圍逼州城。乃語騰曰但免廣嗣及武。即散兵請罪。騰謂將士曰吾若不殺廣嗣等可謂墮軍實而長寇讐。公忻豎子乃敢要人。即斬廣嗣及武以首示之。賊徒阻氣於是出兵奮擊盡獲之。魏恭帝三年轉江州刺史。陵州木籠獠恃險抄掠。詔騰討之。獠既因山為城攻之未可拔。騰於城下多設聲樂及諸雜伎。諸賊果棄其兵仗。或攜妻子臨城觀樂。騰知其無備縱兵討擊盡破之。斬首萬級。俘五千人。世宗初陵眉戎江資邛新遂八州夷及合州民張瑜

兄弟并反。攻破郡縣。騰率兵討之。轉潼州刺史。武成元年。詔徵騰入朝。世宗面勅之曰。益州險遠。非親勿居。故令齊公作鎮。卿之武略。已著遐邇。兵馬鎮防。皆當委卿統攝。於是徙隆州刺史。隨憲入蜀。建德二年。徵拜大司空。尋出為涇州總管。宣政元年冬。薨於京師。贈本官。諡曰定。子玄嗣。

案周太祖宇文泰家武川。地當在內蒙古境。水經注謂城在白道中溪。則在今歸綏武川二縣間矣。山西舊志未審。凡宇文氏皆隸諸寧武者。非也。

又案東魏與北齊。西魏與北周。稱號雖殊。而其人物之時。代界限頗難明白。分劃蓋魏分東西。其君本皆託命於高歡。宇文泰之手。東魏僅十七年。而篡於泰。子宇文覺。是曰北周。故齊西魏亦僅二十四年。而篡於泰。子宇文覺。是曰北周。故

史籍所載二魏之臣僚將帥固無一非賀六渾與黑獺之爪
牙也。於此而欲分魏齊周人物之所屬難矣。昔歐陽永叔撰
新五代史凡當時人物之歷仕數朝者皆編諸雜傳之中亦
史家不得已之手法也。本篇雖標二魏齊周之目而人物事
跡錯綜仍多。後之覽者亦權當歐史雜傳觀可也。

